


BAMPEVE YA YIMBI, NA KATI YA NSAMBULU

 Mu ke na kukiyufula bantu yikwa zaba mwa nkunga yayi, na yina mu ke na kupesa beno mbote ya tiya na kimpangi ya Buklisto mpe na zola ya Klisto bubu yayi, bantu yikwa zaba mwa nkunga yayi, “Yandi Ke Kebaka Nge”? Beno zaba yawu? Mbote, beto mona kana beto lenda. Nge zaba yawu, mpangi-kento? Nge zaba? Ntangu yayi:

Yandi ke kebaka nge,
Yandi ke kebaka nge;
Na mwini to na mpimpa,
Yandi ke kebaka nge.

Oh, ya kele mbote. Beto meka yawu dyaka ntangu yayi.

Yandi ke kebaka nge,
Yandi ke kebaka nge;
Na mwini to na mpimpa,
Yandi ke kebaka nge.

[Kisika ya mpamba na bande—Mu.]

² Tata ya beto ya Mazulu, beto me tonda Nge ti Nge ke kebaka beto mpe me lakisa zola ya Nge na beto, na yina ti Nge fidisaka Mwana ya Nge Mosi ya zola, na . . . Mwana ya Nzambi yina zaba dyambu ve, samu na kubaka kisika ya bansumuki yina zaba dyambu. Mutindu beto me tonda Nge, na yina Nge me keba beto mpe kuzwaka dibanza samu na beto, samu na kusala yayi! Mpe beto me sepela mingi, Mfumu. Beto kele na kyese na kuvukana awa na manima ya midi yayi, na yisi ya ba-voûte ya mazulu, mpe kulomba balusakumunu ya Nge na zulu ya lukutakanu yayi. Pesa, Mfumu, ti konso bakala, kento, mwana ya bakala to ya kento yina kele awa, ti kukota kieleka na kulonguka ntangu yayi Masonuku. Beto kele na ntwala ya yinza yina Satana ke na kutwadisa. Mpe, Tata, beto ke sambila, na yina beto ke na kulonguka ngolo ya bampeve ya yimbi mpe yina ba ke salaka na bantu, ti Nge ke pesa beto lukwikilu ya nene, mpe ti bidimbu mingi ya nene mpe mambu ya ngitukulu kusalama. Samu ti, beto ke lomba yawu na Nkumbu ya Klisto mpe samu na nkembo ya Nzambi. Amen.

³ Beto kele, na kulonguka na manima ya midi yayi, kukota na yawu na nswalu, mu banza, na kutala minuti kumi na tanu na ntwala. Ya kele dyaka na zulu ya *Bampeve Ya Yimbi*.

⁴ Mpe ntangu yayi mu vwanda me kuzwa kaka nsangu, ntama mingi ve; Mpangi Beeler, me katuka na bankudi ya munu. Mpe

mu ke banda na Afrique, na kati-kati ya Ngonda ya sambwadi. Na yawu yina me sukisa yawu, beto me kukubika yawu ntangu yayi. Mpe Mpangi Baxter lenda ve kukwenda na ntangu yina, na yawu mu fwana kwenda na Afrique munu mosi. Na yawu kukwenda kuna na . . . bika ti . . . Beno fwana sambila samu na munu ntangu yayi, ti Mfumu kusadisa munu, samu ti kieleka mu ke vwanda na nsatu ya yawu ntangu yayi, kuna na kati . . . Mu ke na kuingila na lukutakanu yango bantu mafunda nkama zole.

⁵ Mpe mu kele na vision ya kusonika awa. Mu zola ti beno bantu kuzwa ndandu ya mbote ya yawu. Ya kusalamaka na Ngonda ya kumi na zole. Mu vwandaka na kati ya kivinga suka mosi ntangu Wanzio ya Mfumu kwisaka kota. Mu . . . Beno me mona, ntangu mu vwandaka kuna, mu tumamaka ve na Nzambi, mpe mu kuzwaka ba-amibe. Muntu nyonso zaba—zaba yinki amibe kele, nyama yina ke kuzwaka . . . na kutala ke kufwa kwandi nge. Mpe samu ti mu salaka kima yina Nzambi tubaka na munu na kusala ve. Bantu yikwa me kuwaka disolo ya yawu? Mu banza ti ndambu ya beno kele awa. Mu zaba ti bantu ya tabernacle me kuwaka disolo samu na yina kusalamaka. Nzambi tubaka na munu na kukwenda kisika mosi, mpe kuvwanda ntama na kisika *yayi*, mpe kuvutuka na kisika yankaka. Mpe mu bikaka milongi kuzabisa munu kima yankaka. Ntangu yayi, milongi kele bantu ya mbote, mpe ba kele bampangi ya munu ya babakala, kasi beno kuwa yina Nzambi ke tuba na beno. Ya kele kieleka. Beno me mona? Beno kele na kisalu mosi.

⁶ Bantu yikwa ke bambuka moyo kilumbu mosi ya vwandaka na bapofete zole na kati ya Biblia? Mpe mosi ya bawu, Mfumu tubaka na yandi, tubaka, “Nge kwenda na kisika *kingandi*. Mpe nge—nge vutuka ve . . . Nge vutuka nzila yankaka,” mpe nyonso yina. Mpe—mpe tubaka, “Kudya to kunwa ve na ntangu nge ke vwanda kuna.”

⁷ Mpe profete yankaka ya kieleka kukutanaka na yandi, mpe yandi tubaka, “Mfumu me kutana na munu na manima Yandi kutanaka na nge.” Mpe yandi tubaka, “Kwiza na yinzo ya munu.” Mpe profete kuwaka yina profete yankaka yina tubaka, mpe wombisaka luzingu ya yandi na yawu. Beno me mona, beno sala yina Nzambi ke tuba na beno na kusala ata nyonso yina muntu nyonso yankaka ke tuba.

⁸ Ntangu yayi beto kele . . . Na kati ya vision yayi, Yandi . . . Ya vumbulaka munu, na kilumbu ya kumi na tatu ya Ngonda ya yiv- . . . to ya Ngonda ya kumi na zole. Mpe—mpe na yina mu vwandaka ya kuvwanda na lweka ya mbeto ya munu, mu vwanda yindula wapi mutindu ke vwanda luzingu ya munu na ntwala. Mu . . . Ntangu mu vutukaka awa, ba kubamaka na kunata munu na yinzo ya bambevo, banyama na kutala bakaka munu. Mpe ba salaka munu bizame ntangu mu kumaka na yinsi yayi. Mpe, na lemvo ya Nzambi, ba bikaka munu kukwenda na yinzo, samu ti ya mwanganaka mingi. Mpe mu sambilaka, mpe kwendaka

na balongi yango, mu tubaka, “Mfumu me tuba na munu na kukwenda nzila yina ve.”

Ba tubaka, “Oh, Nzambi lenda bika nge mpe kuzonza na muntu yankaka.”

⁹ Mu tubaka, “Koré vwandaka na dibanza yina kilumbu mosi.” Mpe na yawu, kasi mu kwendaka mpe bakaka mwa matiti mpe me tula yawu na zulu ya makulu ya bawu, mpe mu me tuba, “Beno bambuka moyo, na Nkumbu ya Mfumu, kana beto sala nzyetolo yango kuna, ya ke vwanda mbwilu, mpe beto nyonso ke futa samu na yawu.” Mpe kieleka beto kwendaka! Oh, la la! Beto nyonso zolaka kufwa. Na yawu na manima ya kuvutuka . . .

¹⁰ Beno ke kutana na mwa bima mingi na bayinsi ya nzenza yango. Mutindu, kana mwa dititi kutatika beno, ya ke sala ti beno kuzwa dibawu ya tique. Mpe mwa kima yango, ntangu yawu ke tatika beno, kana beno ke kuwa ba-mukusa, beno lenda kukwanza ve. Beno tala, kana ya kele mwa nyama ya fyoti ya ndombi, beno kukatula yawu ve. Yawu ke na yintu ya fyoti, na yawu ya ke salaka nzila ya yawu na kati ya mpusu, ke baluka mutindu *yayi* mpe ke kangama kuna. Kana beno kukatula yawu, beno ke bika yintu na kati kuna. Ya kele na virus na kati ya yawu, yina ke kangaka nzutu ya beno. Na yawu . . . Beno kukalata ve, to kukatula yandi ve; beno baka kaka mwa suif. Mpe yandi ke pemaka na mukongo. Beno losa suif na zulu ya yawu, mpe yandi ke katuka.

¹¹ Dyaka ya kele na mwa ngungi mosi. Yandi ke salaka ata makelele fyoti ve. Yandi ke kwizaka kaka na mupepe. [Mpangi Branham me pesa mwa mbata na diboko ya yandi—Mu.] Yandi ke simba kaka beno, yimeni, beno me kuzwa malaria.

¹² Mpe—mpe dyaka ya kele na yina ba ke bokilaka nyoka mamba. Kana yandi kutatika beno, beno ke zinga kaka na kutala baminuti zole na manima yandi me tatika beno.

¹³ Mpe ya kele na kobra ya jaune. Beno ke zinga na kutala baminuti kumi na tanu na manima ya kutatika ya yawu. Mpe mosi ya yawu vwandaka pene-pene mingi na mwana ya munu, ti yandi zolaka tula diboko ya yandi na zulu ya yintu ya yandi. Yandi vwandaka yimeni ya kutelama, pene na kutatika, ntete beto kubula yandi, mutindu yayi.

¹⁴ Mpe ya kele na kobra ya ndombi. Oh, ya kele kaka na bima mingi! Mpe dyaka bibulu ya mfinda ya boma, kieleka, bankosi, tigre, to bayingo, mpe bima nyonso yankaka yina beto ke kutanaka, na mfinda. Mpe dyaka bimbevo, ya kele kaka na mutindu nyonso ya bimbevo na kati kuna.

¹⁵ Mpe beno fwana kukutana nyonso yina ntangu beno ke kwenda. Na lweka yankaka, ya kele dyaka na nganga-nkisi yina ke telemina beno na nyonso, beno me mona, mpe balukwikilu ya bawu nyonso ya luvunu mpe nyonso. Kasi, mutindu, ya kele kima

ya kuyituka na kumona Mfumu ya beto kukatula kaka yawu, bisika nyonso, mutindu yina, na manima kulandila.

Mpe kilumbu yina, mu vwandaka ya kutelama kuna, mu ke na kubambuka moyo mbote, na yina kusalamaka, mu ke tubila beno yawu mbala yankaka na lukutakanu yankaka, samu ti mu zola kukota na dilongi ya munu na manima ya midi yayi, ya *Bampeve Ya Yimbi*.

¹⁶ Kasi ntangu yayi, mpe mu vwanda banza na yayi, ya kuvwanda kuna, na wapi mutindu yawu ke manisa? Mpe na kusabukaka mubu na kuvutuka, mu zaba ti beto kuzwaka pene-pene ya nkama ya fundu ya bayina kundimaka na yina beto vwandaka kuna. Mpe Mpangi ya bakala ya kiboba Bosworth me kwiza na munu. Tubaka, mu tubaka, “Mbote, Mpangi ya bakala Bosworth?”

¹⁷ Yandi tubaka, “Mu ke na kusepela mingi samu na nge, Mpangi Branham!” Yandi tubaka, “Nge ke kaka—nge ke kaka na kati ya kubanda ya luzingu,” mpe yandi tubaka.

¹⁸ Mu tubaka, “Mbote, mu banza ti nyonso me manisa.” Mu tubaka, “Mu me luta bamvula makumi yiya. Mu banza ti mu me nwana mvita ya mbote mpe me manisa kukima.”

¹⁹ Yandi tubaka, “Me luta bamvula makumi yiya?” Yandi tubaka, “Mu ndimaka ntete ve na bamvula yina.” Yandi tubaka, “Mu kele dyaka mbote.” Yandi vwanda pene-pene mingi ya bamvula makumi nana. Mpe kaka . . .

Mu banzaka, “Mbote, mu banza ti ya kele na kutala ya kulunga.”

²⁰ Na yawu yandi tubaka, “Ve, nge kele kaka mwa Branham mosi ya malu-malu ntangu yayi. Nge me zaba kaka mutindu ya kutwadisa balukutakanu ya nge mbote, mpe nyonso.” Yandi tubaka, “Kana nge kutelemina Amerique na mutindu ya kulunga, na lukutakanu ya kuyilama mbote, kisika nge lenda vwanda basabala sambanu to nana na kisika mosi, mpe nge kuzwa yawu ya kuyilama mpe ba pesa nsangu bisika nyonso,” yandi tubaka, “nge ke sala kima, kasi, mpe samu na Mfumu ya beto.” Na yawu beto landilaka, kaka mutindu yina, na yawu ya vwandaka kieleka—kieleka mbote.

²¹ Na yina na manima ya mwa ntangu, mu monaka vision, na yina mu vwandaka na Amerique, mpe ya kwizaka na munu, mpe vutulaka munu na Afrika, mpe ya vwandaka lakisa munu lukutakanu kaka mosi yina, yina vwandaka kuna na ntwala ya Durban. Mpe lukutakanu ya ntete vwandaka zimbana malembe-malembe na kati ya disolo, na kukwendaka na Wesete. Lukutakanu ya zole me kutelama mpe, na yina ya kutelamaka, ya vwandaka dyaka nene kulutila lukutakanu yina vwandaka ya ntete. Mpe Yandi . . . Mu kuwaka kuboka, mpe Wanzio mosi me katuka na Mazulu; Yandi vwandaka na mwinda ya nene.

²² Mpe Wanzio ya Mfumu yina kele pene-pene ya beto awa, vwandaka ya kutelam- . . . ntangu nyonso yina ke vwandaka na lweka ya munu ya bakala, na lweka *yayi*. Mpe Yawu vwandaka ya kutelama kuna, mpe Yawu vwandaka—Yawu vwandaka tambula na kubalukaka. Mpe mu monaka Muntu yayi ya kutelama na yisi ya Yandi. Yandi kele—Yandi kele ve . . . Ntangu yayi, ya kele vision ve ntangu beno ke mona Yandi. Ya kele kaka kieleka mutindu beno ke tala munu. Mbote, beno lenda kuwa Yandi kutambula mpe kuzonza na beno. Mpe ntangu Yandi . . . Nyonso, ya kele kaka kieleka. Mpe ya kele ve vison; Muntu kele kaka ya kutelama kuna mutindu kaka mosi beno kele. Mpe ndinga ya Yandi kele kaka mutindu mosi na yina lenda vwanda ya munu to lenda vwanda ya beno. Kasi vision, kele kima mosi yina ke zenganaka na ntwala ya beno mpe beno ke mona yawu, mutindu yina. Kasi Muntu yayi ke belama kaka mpe ke vwanda kuna.

²³ Na yawu Yandi tubaka na munu ti . . . yinki zolaka salama. Mpe Yandi tubaka ti . . . Wanzio yayi me kulumuka, mpe Yandi me tuba na munu na kubaluka mpe na kutala lweka *yayi*. Mpe ya vwandaka talana mutindu na lweka ya Inde, ntangu yayi. Mu me tuba ve ti ya kele na Inde, kasi ya kele pene-pene. Kasi ya vwandaka bantu ya Inde.

²⁴ Samu ti, bantu ya Afrique kele bantu ya nene, ya banzutu ya ngolo, ya kizitu. Bayankaka ya bawu kele pene-pene ya bametele zole na kumi ya yinda, mpe ke tesa bakilo, oh, bankama zole na makumi nana, bakilo nkama mosi na makumi zole na sambwadi na nkama mosi na makumi tatu na sambanu, ya nene. Bazulu, awa, ba-Songhaïs mpe Ba-sothos, mpe, oh, ya kele na bandinga mingi ya luswaswanu. Ya vwandaka na bandinga ya luswaswanu kumi na tanu ya kuvwanda kuna kilumbu yango, na bayina mu vwanda zonza.

²⁵ Mu vwanda tuba dyambu mosi, mutindu, “Yesu Klisto, Mwana ya Nzambi.” Mu zolaka kwenda baka masa ya kunwa ntete ya luta na mitendudi nyonso. Mosi zolaka tuba . . . Mpe makelele nyonso!

Mu vwanda banzaka, ntangu mu vwanda kuwaka bantu ya Pentecote kuzonza na bandinga ya malu-malu, ti mu banza mosi vwanda zonza na mutindu mosi ya muningu mpe mosi vwanda zonza mutindu yankaka, wapi mutindu na yinza ya lendaka vwanda? Kasi mu ke kwikila Biblia kele kieleka, mpe zaba ti Yawu kele, ntangu Yawu ke tuba, “Ya kele ve na muningu yina ke kondwa nsasa.” Ya kele kieleka.

Bayankaka ya bawu zolaka tuba, mosi ya bawu vwanda baka, “Blrr blrr blrr blrr,” yina zolaka tuba “Yesu Klisto, Mwana ya Nzambi.” Yankaka vwanda kwenda, “Cluk cluk cluk cluk,” yina vwandaka “Yesu Klisto, Mwana ya Nzambi,” na ndinga ya yandi. Na yawu ata wapi mutindu ya muningu ya kele, ya zola

tuba kima kisika mosi. Ya kele kieleka. Ata wapi mutindu ya makelele ya kele, ya zola tuba kima samu na muntu kisika mosi. Mpe na yina Yandi vwandaka. . . Ba vwanda bangula yawu.

²⁶ Mpe mu me tala na diboko ya munu ya kento, ntangu Wanzio yango kulumukaka mpe mu monaka lutangu ya bantu kuna, mpe ba vwandaka muntu na. . . mutindu ti ba vwandaka na lele ya kuzungidila bawu, mutindu *yayi*, mpe vwandaka ya kufika mpe ya kukanga, mutindu ya mwa bébé, couche. Mpe ya vwandaka. Mpe mu vwanda lenda kaka kumona na ntama mutindu mu lendaka kumona, ya vwandaka kima yankaka ve kasi bantu. Mpe kuna Wanzio yayi me namisa mwinda ya nene yina vwanda kwenda bisika nyonso zole, mpe me banda na kukwenda na manima mpe na ntwala, mutindu *yina*. Mpe ata mbala mosi ve mu me monaka bantu mingi na luzingu ya munu!

²⁷ Mpe kuna Wanzio yayi yankaka me belama kieleka na munu, mpe Yandi me tuba, “Ya kele na bantu bankama tatu ya funda na lukutakanu yango.” Mpe mu kele na yawu ya kusonika awa. Mpe beno sonika yawu na mwa mutindu ya mukanda, mutindu mu tubaka na yina me tala mwa mwana ya bakala yina vumbukaka na lufwa na Finlande. Beno sonika yawu na kisika ya mpamba ya Biblia ya beno to kisika mosi, ti na lukutakanu yayi (Ya ke vwanda na lukutakanu. Mpe beno ke kuwa yawu na nzila ya bima yina ke mwangisaka nsangu.) ti bantu bankama tatu ya funda ke vwanda na lukutakanu yango. Ntangu yayi, beno mona kana ya kele kieleka ve. Ya ke vwanda bambala tatu nene na yina vwandaka. Beno me mona? Bankama tatu ya funda ya bantu ke vwanda na lukutakanu. Mpe mu kele kaka na kyese mingi na kukuma kuna, mu zaba ve yinki ya kusala, samu ti mu zola kununga myela samu na Mfumu ya beto.

²⁸ Mpe kuna, na mbala mosi, kumona—kumona makumi tatu ya funda ya mimpani ya kukula kukwiza na Yesu Klisto na mbokololo mosi na autel, mimpani ya kukula makumi tatu ya funda.

²⁹ Ntangu yayi ti beto kukota na dilongi ya beto mbala mosi. Mazono beto longukaka mutindu ya kusala ya bampeve ya yimbi. Mu vwanda yindula bubu yayi, na yina Nzambi vwanda sala na munu. Beno zaba ve yinki ya kele na kuzwa kimpwanza ya kukwenda na ntwala. Ntangu yayi, mu kele mulongisi ve. Mu kele ntama mingi na kuvwanda muntu yina ke pesaka mulabu ya Biblia. Mpe mu kele. . . Mu bikaka lukolo na kitezo ya sambwadi. Na yawu ya kele. . . Mpe, ti, mu bikaka lukolo ya me luta na kutala bamvula makumi zole na tanu, na yawu ya kele ntama bilumbi mingi. Mpe mu me longuka mingi ve, kasi nyonso yina mu zaba kele yina mu ke kuzwaka na nzila ya dibanza ya kimpeve. Mpe kana dibanza yango ya kimpeve kufwanana ve na Biblia, kuna ya kele luvunu. Beno me mona? Ya fwana vwanda Biblia. Ata wapi dibanza ya kimpeve ya kele, ya fwana katuka. . . *Yayi* kele fondasio ya Nzambi. Ata fondasio yankaka

kele ya kutula kasi Yayi. Mpe yina Yayi kele, kana yina mu lenda tuba lendaka vwanda ya kuswaswana na Yayi, beno bika mambu ya munu kuvwanda luvunu, samu ti Yayi kele Kieleka. Beno me mona? Beno me mona? Mpe kana wanzio kutuba na beno kima yina lenda vwanda ya kuswaswana na Yayi, Paul tubaka, “Ti yandi vwanda ya kusinga samu na beno,” ata ti wanzio ya Nsemo. Ntangu yayi, ya kele na bima mingi ya nene. Mu kaka . . . kaka . . . Mu solaka bilumbu zole, samu na kunata dilongi yayi na bantu, yina vwandaka mazono mpe bubu yayi, na balukutakanu ya manima ya midi.

³⁰ Ntangu yayi, kikuma mu me sala yayi, ya kele samu na kupesa munu mosi mwa kumeka na kumona kana Nzambi lenda sadisa munu. Ya kele na kima na ntima ya munu. Mpe yayi kele, ti, na manima ya Nsangu ya nene yayi, mpe ti na manima Nzambi Yandi mosi kupesa kimbangi na yina mu tubaka na kuvwanda Kieleka, na Ndinga ya Yandi; na nzila ya Ndinga ya Yandi, ntete, mpe na manima na nzila ya bidimbu mpe bimangu. Ntangu yayi, mu banza, na Nsangu ya mbote ya Kieleka na Dibuundu, mu kele ya kukangama, na Nzambi, na kunata yayi na Dibuundu. Ya kele kiekaka. Ba kele mingi ya kukabuka, na mutindu mingi ya ba-organisation mpe bitini ya binzambi-nzambi ya mosi na mosi, ti ya kele yimbi. Beto nyonso kele bana ya Nzambi na yina beto me butama ya malu-malu, Yina, beno me mona. Mpe kieleka ya dyambu kele ti Nzambi zola ti beto kuzaba ti, ti beto kele bana ya Yandi.

³¹ Ntangu yayi, beno bambuka moyo, tempelo ya Salomon kuzengamaka, bisika nyonso na yina. Mpe awa me kwiza ditadi mosi ya kubaluka mutindu *yayi*, mpe ditadi mosi ya kubaluka mutindu *yina*, mpe mosi ya kuzenga mutindu *yayi*, mpe mosi ya kuzenga mutindu *yina*, kasi, na ntangu ya kuvukisa, ya vwandaka ve na makelele ya dingwengwe, to ya kikonko, kima nyonso kukotaka ya kulunga na kisika ya yawu. Nzambi vwandaka Muntu ya malongi ya yawu.

³² Nzambi kele na dibuundu ba ke bokilaka Bimvuka, mpe mosi dibuundu ya Nzambi, mpe mosi *yayi*, mpe mosi *yina*. Mpe, kasi ntangu bawu nyonso ke kwiza kintwadi, ba ke kuma nkonga mosi ya nene ya bumpangi ya zola, mpe Nzambi ke tula, ke vukisa Dibuundu yango kintwadi mpe ke nata Yandi na zulu na dizulu.

³³ Konso kifikulu ya nsangu, ntete ba tula yawu na yinzo ya bifikulu, ba fwana tula yawu, kuluta na yinzo ya masawula, ntete. Muntu yina fikulaka, a gusto, to, lemvo, mu ke na kuzimbana nkumbu ya yandi, yina fikulaka Madia Ya Santu, na mutindu nyonso, ya bakaka yandi luzingu ya yandi nyonso. Yandi fikulaka kifikulu yina. Ya vwandaka na kutala bamvula makumi zole, to bamvula kumi, mu banza, na kati-kati ya kufikula Klisto mpe Judas. Mpe beno me bakulaka, na kifikulu ya nsangu yango, ti muntu mosi yina salaka samu na Klisto,

bamvula kumi na ntwala salaka samu na Judas? Ya kele kieleka. Yandi salaka yawu. Bamvula kumi ya disumu, muyimbi ya nene ya opera, samu na kusala kisika ya Klisto, na kwiza na kisika ya Judas. Beno fwana baka bamvula kumi ve. Ya ke baka baminuti kumi, na kusala kima mutindu mosi na beno. Ya ke sobisa nkadulu ya beno, na disumu. Kasi, na mutindu nyonso, kifikulu yango lutaka na bakutinguna nyonso.

³⁴ Mpe ya kele yina mu ke banza samu na Dibuundu ya Nzambi, nkonga yina kele ya kubokila. Mbote, mu zola kutuba yayi ve na mutindu ya ngolo. Mu me zyeta bamubu nyonso sambwadi, mpe mu me sala nzyetolo ya munu ya tatu na kizungo ya yinza, mpe bantu ke tuba, “Exalté! Exalté!” Mpe mu me sosa na yinza, mpe mu me monaka ntete exalté ve. Ya kele nkumbu dyabulu me namika na bantu. Kaka yina. Ya kele na kima ve mutindu exalté. Mpe mu kele na lutangusu ya konso bankama sambanu ya funda na makumi sambanu na nana ya mabuundu yankaka yina kele, mpe ya kubongisa na yinza, ya kele ve na mosi ya bawu yina ba ke bokilaka ba-Exalté. Mpe yina me katuka na luyalu. Ya kele ve na dibuundu Exalté yina mu zaba. Na yawu, ya vwandaka kaka kima yina dyabulu me pesa nkumbu. Kasi, ntangu yayi, na nyonso yayi, na bima nyonso yayi, Nzambi me fikula kifikulu. Mpe mbala mosi mwa mabuundu yayi ya ntama yina vwanda vwandaka na ngaanda awa, ndambu ya beno. . .

³⁵ Mu ke na kutala mbote babakala yayi ya bansuki ya mpembe. Mwana ya munu ya bakala, mazono; mu vwanda na kati ya kivinga, vwanda tanga, mpe longi mosi me kwiza mpe me tuba, “Mu zola kupesana maboko na tata ya nge.” Samu ti, mwana ya munu ya bakala kuvwandaka na lukolo ya Mpangi Baxter mpe bawu, kele kaka, “Ve,” kaka yina, na nswalu. Mu ke zolaka mutindu yina ve. Beno me mona? Ata kana ti mu . . . Kieleka, mu lenda vwanda ve kisadi ya muntu mpe ya Nzambi, mpe. Kasi mu banza ti mu zola kupesana maboko na bankundi ya munu. Mu ke zolaka kusala yawu. Ya kele na kima na yina, mu ke zolaka kupesana maboko na—na longi mosi. Kaka longi ve, kasi konso mwana ya Nzambi, mu zola kusala yawu. Mu vwanda zaba yawu ve tii ntangu kento ya munu me tubila munu yawu mwa ntangu fyoti. Mbote, kana yandi zolaka tuba na longi yango, “Vingila fyoti, yandi kele na manima kuna na bisambu, mpe—mpe mu ke mona yinki yandi ke tuba.” Mbote, ti, yina zolaka vwanda mbote mingi. Na yawu mu me sungisaka yandi samu na yawu, na kusala yawu ve. Beno me mona?

³⁶ Mpe na yawu ya kele kieleka, beto lenda kwiza kaka mbala mosi ve, mutindu mpangi ya bakala na mwa ntangu vwanda me tuba. Kana beno sala yawu, kuna na mpimpa mu—mu ke vwanda ya kulemba mingi, beno me mona. Bantu ke kota na kuzonza, mpe mu banza ti mosi na mosi kele na kimbevo, mpe na yina ba ke kota na kuzonzila yawu, na nswalu, beno tala Wanzio ya Mfumu yina kele kuna samu na kutuba yina kele dyambu yango.

³⁷ Ya kele na muntu ya kuvwanda, yina ke na kutalaka kaka na munu ntangu yayi, yandi zaba ti ya kele kieleka, kaka mwa baminuti fyoti me luta, to na kutala ngunga mosi na ndambu me luta. Mama ya kuvwanda awa, yina vwanda zaba ve yinki ya vwandaka, ti Wanzio ya Mfumu kuzonzaka na yandi nkokila yankaka yina mpe tubaka na yandi kima, mpe yandi vwanda bakula yawu ve. Kasi bubu yayi ya me salama, na yawu yandi zaba ntangu yayi yinki ya zola tuba ntangu Yandi vwandaka zonga na yandi. Mpe mutindu, ya kutelama kuna vwanda zonga na yandi, Wanzio ya Mfumu me kwiza mbala mosi mpe me tuba na yandi yinki vwandaka mpasi ya yandi, mpe samu na yinki nyonso yina, mpe—mpe na yina yandi vwandaka banza, mpe mosi ya baya yandi ya zola, mpe mutindu Nzambi kuzonzaka mpe tubaka ti Yandi me pesa kimbangi ya yawu, mpe yina zolaka salama. Na yawu ya kele kaka kieleka mutindu ya ke vwanda. Beno me mona? Nzambi tubaka yawu.

³⁸ Mbote, ntangu yayi, yinki samu na mwa bantangu yina . . . Na yina, mpe konso vision ke lembisa kaka beno mingi, beno me mona. Mpe kima ya ntete beno zaba, ntangu beno ke kumaka na dibuundu na nkokila, beno kele kaka ya kulemba mingi tii beno zaba kaka ve yinki ya kusala. Mpe beno sambila samu na munu ntangu yayi, beno me mona, samu ti ya kele kubasika na lukutakanu mosi na yankaka, na yankaka. Kana yayi vwandaka lukutakanu kaka mosi, ya zolaka vwanda mutindu yankaka, kana mu zolaka kwenda na yinzo ntangu yayi mpe zolaka kwenda sala kima ve samu na bangonda zole, mu zolaka basika mpe kubaka yinti ya munu ya kuloba mpe kukwenda loba. Kasi mu fwana kwenda katuka lukutakanu mosi mbala mosi na yankaka, kukatuka na mosi mbala mosi na yankaka, beno me mona. Ya kele yina ke salaka yawu.

³⁹ Mpe beno nyonso kusambila, beno bantu awa na kati ya dibuundu. Ba me tuba na munu mazono na nkokila ti mu—ti mu vwanda zonga na muntu mosi, mpe muntu yango kupesaka mvutu ve na lubokilu. Ntangu yayi, yayi kele dyambu ya boma mingi, beno me mona. Ntangu ba tubaka yawu . . . Mbote, bantangu yankaka minda yayi ke sema ve, ya kele na mpimpa na nsongi mosi na kati-kati kuna.

⁴⁰ Mpe mu ke talaka mbote Wanzio ya Mfumu ntangu Yandi ke telamaka awa, mu lenda kuwa yawu na nzutu. Na manima mu ke tala Yawu kukatuka munu, mpe mu ke tala mbote, Yawu ke bika munu mpe Yawu ke kwenda kisika mpe ke telama kuna mwa fyoti, mpe mu lenda mona Yawu. Mpe Yawu ke banda na kulezima mpe kuna vision ke kwiza. Kuna mu ke mona vision. Mu ke tala mbote mutindu ya muntu ya kele kuna. Mu ke zaba muntu, kuna mu ke zonga. Ya kele yina ke salamaka. Ya kele yina ke salamaka. Na muntu nyonso ve beno lenda tuba yawu, kasi ya kele—ya kele yina ke salamaka, beno me mona. Ya ke salamaka nyonso na kimpave.

41 Na yina kana muntu yango kupesa mvutu ve, ya ke vwanda mutindu kutanga Biblia awa mpe kutuba, “Kima ve na Yawu,” mpe kubika Yawu. Beno me mona? Na yawu ya ke sala kieleka yimbi. Na yawu beno sala keba, beno kuwa, beno tala mbote. Ntangu Yandi ke zonzaka, beno pesa mvutu. Beno me mona, beno vwanda kaka ya kuyilama samu na kupesa mvutu na konso ntangu.

42 Mpe na yawu kento ya munu, mpe Mpangi Beeler mpe mingi ya bawu, na suka yayi, vwandaka tubila na munu na yawu, ti ba vwanda bokila muntu mosi samu na yina me tala mpangi ya yandi ya bakala, kisika mosi, ti kima ya yimbi kusalamaka na yandi, mpe nyonso yina. Mpe muntu yango kupesaka mvutu ve na lubokilu, na yawu yina lenda ve kusadisa. Yina me tala Nzambi na muntu yango. Vision me katukila munu. Na manima mu vwanda lenda dyaka ve na kutala yawu, samu ti yandi kupesaka mvutu ve. Na yawu, beno tala mbote, beno sala keba.

43 Ntangu yayi beto baka dilongi yayi ya *Bampeve Ya Yimbi* mpe beto zonzila na yina me tala bampeve ya yimbi. Ntangu yayi, bantu, ntangu beno ke tuba “mpeve ya yimbi,” na mbala mosi bawu ke banda na kubanza, “Oh, bufanatiki to kima!” Kasi bampeve ya yimbi kele kaka kieleka mutindu Bawanzio. Ba kele kaka kieleka.

44 Mpe dyabulu kele kaka kieleka dyabulu, mutindu Yesu Klisto kele Mwana ya Nzambi. Yandi kele dyabulu! Mazulu kele kaka kieleka. Mpe kana ya kele ve na kima mutindu difelo, ya kele ve na kima mutindu Mazulu. Mpe kana ya kele ve na lusakumunu ya Seko...to, ndola ya Seko, ya kele ve na lusakumunu ya Seko. Kana ya kele ve na kilumbu, ya kele ve na mpimpa. Beno me mona? Kasi mutindu kieleka ya kele na kilumbu, ya kele na mpimpa. Mutindu—mutindu kieleka ya kele—kieleka ya kele na Muklisto, ya fwana vwanda na muntu ya luvunu. Mutindu kieleka ya kele na muntu yina kele kieleka ya Nzambi, ya kele na muntu samu na kumekula yawu. Beno me mona? Ya kele kieleka kaka ya mbote mpe ya yimbi, ndombi mpe mpembe, mutindu na nyonso ya luzingu, kieleka mpe luvunu bisika nyonso. Mpe ya kele na nsangu ya mbote ya luvunu, ya kele na nsangu ya mbote ya kieleka. Ya kele na Mbotika ya kieleka, ya kele na mbotika ya luvunu. Ya kele na kufwanikisa ya luvunu, mpe ya kele na kieleka. Ya kele na dollar ya kieleka ya Amerique, ya kele na dollar ya luvunu ya Amerique. Ya kele na Muklisto ya kieleka, ya kele na muntu ya luvunu ya kieleka, beno me mona, ya kele kaka bilanda-landa. Na yawu beno ke tala yina, na yawu yawu nyonso ke tambulaka kintwadi. Ntangu yayi, beto lenda kabula yawu ve. Nzambi ke bikaka mvula kubwa.

45 Ti Yandi pesa munu muswa ya kuzonza awa mwa fyoti. Milongi yikwa kele awa, beno telemisa maboko ya beno. Bisika nyonso, milongi, bika beto kumona maboko ya beno. Mbote, Nzambi kusakumuna beno, bankundi. Ntangu yayi, ntangu yayi,

beno baka yayi mutindu malongi ve ntangu yayi, kasi, kaka ntete kukota na dilongi ya ngundi yayi, mu ke tuba na beno yayi. Bantu yikwa kele bantu ya Pentecote? Beno telemisa maboko ya beno, nyonso bisika nyonso. Mbote, beno nyonso kele bantu ya Pentecote. Mbote mingi. Mu ke tuba na beno yinki kuminaka munu mbala ya ntete mu kumaka na kisika ya beno, na kitezo ya beno.

Mu vwanaka kaka awa na Indiana, na kisika mosi ba ke bokilaka Mishawaka. Nkonga ya ntete ya bantu ya Pentecote yina mu monaka ntete, ba vwanda bokila bawu Bimvuka ya Pantekote ya Yesu Klisto, mu banza, to kima mutindu yina, nkonga mosi ya bantu ya mbote mingi. Ntangu yayi ba me bongisa yawu kintwadi mpe ba ke bokilaka bawu Bantu ya Pentecote ya Kuvukana. Bawu kukabukaka na bayankaka, samu na dyambu ya mbotika na masa. Yina ke sala bawu ve bantu ya luvunu. Ya kele na Baklisto mingi ya kieleka, kieleka kieleka ya Mpeve-Santu, ya kubutuka ya mona na kati-kati ya bawu. Mpe Nzambi pesaka bawu Mpeve-Santu na kuvwandaka ya kubotika na “Nkumbu ya Yesu,” mpe me pesa bayankaka mbotika ya Mpeve-Santu, na kuvwandaka ya kubotika na “Tata, Mwana, Mpeve-Santu.” Na yawu, “Nzambi me pesa bawu Mpeve-Santu, bayina ke tumama na Yandi,” na yawu bayina—bayina me kuzwa, bayina ke tumama na Yandi? Beno bawu yayi.

⁴⁶ Kana beno zola kaka kuzimbana yawu, mpe bayina zola kuvwanda mutindu yina, beno bika bawu, mpe beno kwenda na ntwala mpe beno vwanda bampangi. Kaka yina. Ve... Yina salaka yawu, vwanaka kukabuka ya bawu, kukabwana. Beno me mona? Yinki? Ya vwanaka ya kukabuka, kutiamuna, kukabuka ya bumpangi, ya kuvwanda na lweka mpe kukabuka beno mosi. Ve, tata, beto kele ya kukabuka ve, beto kele mosi. Ya kele kieleka.

⁴⁷ Kasi na yina mu vwanaka ya kutelama kuna, mu vwanaka tala mbote bantu yango. Awa, munu, yina me katuka na mwa dibuundu ya ntama ya kulunga ya Baptiste ya Sude, mbote, mu vwanda mona bantu yango, mu kotaka kuna mpe ba vwanaka bula maboko ya bawu, vwanda yimba na ngolo nyonso, “Mosi ya bawu, mosi ya bawu, mu ke na kyese ya kuvwanda mosi ya bawu!”

⁴⁸ Mu banzaka, “Oh! Fiou!” Kima ya ntete beno zaba, awa me kwiza muntu mosi kuna, yina vwanaka bina na ngolo nyonso. “Ttt-ttt-ttt-ttt-ttt,” mu banzaka, “wapi mutindu ya kusala na kati ya dibuundu! Mu kuwaka ntete ve bima ya mutindu yina.” Mu landilaka na kutala bawu mbote, bisika nyonso. Mu vwanda kukiyufula, “Mbote, yinki na yinza kele dyambu ya bantu yayi?”

⁴⁹ Ntangu yayi, beno kuwaka munu kutuba disolo ya luzingu ya munu, ntangu mu kotaka na lukutakanu yango kuna. Kasi yayi kele kima mosi ntete mu tuba, mu me tubaka yawu ntete

ve, na ntwala ya bantu. Na yawu bawu. . . Ntangu yayi, kana beno zola kukatula yawu na bande ya beno, mbote, ya me tala beno. Mbote mingi. Ntangu yayi, na kutalaka yayi mbote, mpe kuna mu me banza, “Mbote, bantu yayi kele bantu ya kulutula na nsayi yina mu me monaka ntete na luzingu ya munu.” Ba vwandaka ve na nsoni ya lukwikilu ya bawu. Beto ba-Baptiste ke talaka kaka mwa fyoti nsoni, bantangu yankaka, beno zaba. Beno me mona? Mpe na yina ba ke kwendaka na kusambila, beno zaba, ba ke kwenda na manima ya éventail, beno zaba. Mpe—mpe, kasi beno. . . Kasi bantu yina ve, mpangi, ba—ba vwandaka na nsambulu nyonso na kati, na ngaanda, mpe bisika nyonso ya bawu.

⁵⁰ Mbote, mu ke bambuka moyo na mpimpa yango ntangu mu kwendaka na estrade. Ba tubaka, “Balongi nyonso na zulu ya estrade.” Ya vwandaka lukutakanu. Ya lungaka ti ba sala yawu awa na Node, samu na dyambu ya kukabuka—ya kukabuka ya bandombi, musiku ya Jim Crow na Sude. Na yawu bawu nyonso ya bisika nyonso kukutanaka kuna. Na yawu, mu vwandaka ya kuvwanda kuna na zulu. Mpe yandi tubaka. . . Mbote, ntangu yayi ya kele. . . Mu kuwaka milongi nyonso kilumbu yango nyonso mpe mpimpa yango. Ba me samuna kiboba mosi ya mulongi, ya vwandaka kiboba mosi ya ndombi ya bakala yina kwizaka, kaka na mwa bansuki ya fyoti ya kuvukisa na yintu ya yandi, mutindu *yayi*, ya kulwata kazaka ya yinda ya ntama ya milongi, beno zaba, ya nkingu ya velour, mpe mwini vwandaka. Kiboba ya mawa yayi kwizaka kuna mutindu *yayi*. Yandi tubaka, “Bana ya munu ya luzolo,” yandi tubaka, “Mu zola kutuba na beno,” yandi me banda na kupesa kimbangi. Mu vwandaka na kutala ya kulutula ntwenya ya kuvwanda na zulu ya estrade. Na yawu kuna yandi me tuba, “Mu ke tuba na beno!” Yandi tangaka na Job, “Wapi kisika nge vwandaka ntangu Mu vwandaka sala yinza? Tuba na Munu kisika ya kele ya kutelama.”

⁵¹ Milongi nyonso yankaka yayi vwandaka longa samu na Klisto, na mutindu ya konso ntangu. Mu kuwaka bawu, mu sepelaka na bawu. Kasi bakala ya kiboba yina ve! Yandi vutukaka na manima na kutala bamvula kumi ya funda ntete yinza kubanda. Yandi me kwenda na Mazulu mpe me kulumuka na kututaka na mazulu, yinki kusalamaka. Yina ba vwandaka longila, na kulandilaka, na kilumbu yango nyonso; yandi vwandaka longila na yina kusalamaka na Mazulu. Yandi me vutula Klisto na mukyama ya kulala, kisika mosi ntama kuna na Seko. Kasi, yandi kulongaka ve na kutala baminuti tanu ti kiboba yina, Kima kusimbaka yandi. Yandi me dumuka na zulu mpe me sala makelele na kuvukisaka binkoso ya yandi, mpe me yimba na ngolo, “Youppi!” Yandi vwandaka na kisika na kutala mutindu yina kele na munu awa. Yandi me tuba, “Beni kele ve na kisika mingi samu na munu na kulonga,” mpe yandi me kwenda

mutindu yina.

⁵² Mbote, mu banzaka, “Kana yina lenda sala yina na bakala na kutala ya bamvula makumi nana, yinki ya lenda sala na munu? Ya kele yina mu zola. Ya kele yina mu zola.”

⁵³ Kasi yina nyongisaka munu vwandaka yayi. Ntangu yayi, beto ke zonzila na bampeve ya yimbi ntangu yayi. Yina nyongisaka munu, mu vwanda tala mbote babakala zole. Mosi vwandaka ya kuvwanda kisika mosi, mpe mosi lweka yankaka. Mpe na yina Mpeve vwanda kubwa, babakala yango vwandaka telama mpe vwandaka zonza na bandinga ya malu-malu mpe vwandaka boka, mpe vwandaka basika mafulu-fulu na yinwa. Mpe mu vwandaka banza, “Oh, la la, kana mu lendaka kaka kuzwa yawu!” Beno me mona? “Mutindu ya kele mbote mingi! Oh, ya kele. . .mu zola kaka yawu!” Mbote, mu kwendaka na bilanga ya masangu. Mpe mu tubaka na beno disolo ya luzingu ya munu. Beno tangaka yawu na buku. Mu lalaka mpimpa nyonso. Mpe mu vutukaka suka yina vwandaka landa, na yawu mu kumitubaka ti mu ke kwenda sala kaka kuteza. Mu kele na mutindu ya kusala bima yina muntu ve zaba kasi Nzambi na munu. Na yawu, ti, mu ke baka kingana mpe ke kwenda kukutana mpeve ya muntu. Beno ke monaka kaka yawu awa na zulu ya estrade. Beno me mona? Mpe na yawu mu bandaka na kuzonza na mosi ya babakala yango. Mu monaka bawu, ba vwandaka ya kuvwanda pene-pene kintwadi, mpe ba vwandaka ya kusimbisa maboko mpe vwandaka bina mpe vwandaka boka. Mu banzaka, “Oh, la la, yina ke wakana kieleka samu na munu!”

⁵⁴ Mpe mu bakaka mosi ya maboko ya yandi. Mu tubaka, “Mbote, tata?”

⁵⁵ Yandi tubaka, “Mbote.” Kieleka bakala mosi ya mbote, mutindu ya muntu ya mbote. Yandi tubaka. . .

Mu tubaka, “Nge kele mulongi?”

Yandi tubaka, “Ve, tata. Mu kele kaka mundimi ya dibuundu.”

⁵⁶ Na yawu mu bandaka mwa disolo na yandi samu na kusimba mpeve ya yandi. Beno me mona? Yandi vwandaka zaba yawu ve. Muntu ve zabaka. Ata mbala mosi ve mu me tubaka kima samu na yawu. Bamvula kulutaka, ntete mu zonza yawu. Na yawu bawu. . .Kasi ntangu mu talaka yinki ya vwandaka, ya vwandaka wakana kieleka, kaka ya kulunga, Muklisto ya bakala! Bakala yina vwandaka kieleka santu ya Nzambi. Mu banzaka, “Mpangi ya bakala, ya kele mbote.”

⁵⁷ Kasi kima ya ngitukulu, ntangu mu simbaka bakala yankaka yina, ya vwandaka mutindu yankaka. Yandi vwandaka zinga mpe na kento yina vwandaka ve kento ya yandi. Ya kele kieleka. Mpe mu monaka yawu kubelama na yandi, vision. Mu banzaka, “Oh, la la, ya lenda vwanda kieleka ve.” Mpe bakala yango. . .

mu banzaka, “Ntangu yayi, ntangu yayi, mpeve yayi na kati-kati ya bantu yayi kele yimbi. Kaka yina ya kele.”

⁵⁸ Na yawu na mpimpa yango na yina...kwendaka na lukutakanu, mpe ti balusakumunu vwandaka kubwa, mu vwandaka sambila Nzambi, mpe Mpeve-Santu, Wanzio ya Mfumu pesaka kimbangi ti ya vwandaka Mpeve-Santu. Mpe Mpeve mosi yina vwandaka kubwa na zulu ya bakala *yayi* vwandaka kubwa na zulu ya bakala *yina*. Mpe na yina Mpeve vwandaka kubwa, bawu zole vwandaka telama, mpe bawu zole vwandaka boka mpe vwandaka zonza na ngolo mpe vwandaka kembila Mfumu, mpe vwandaka zonza na bandinga ya malumu mpe vwandaka bina. Mu tubaka, “Mu—mu—mu ke na kulenda kaka ve na kubakula yawu, Mfumu. . . Mu ke na kumona yawu ve na kati ya Biblia, kisika ti ya kele ya kulunga.” Na yawu mu tubaka, “Mu banza ti mu kele yina kele ya kuvuna.” Beno me mona? Mu tubaka. . . Ntangu yayi, awa, mu—mu lenda ve. . . Mu—mu kele kieleka ya kukangama ngolo na malongi ya Biblia. Ya fwana vwanda Yayi. Beno me mona? Mu tubaka, “Mfumu, Nge zaba mutindu mu kele, mpe mu—mu fwana mona yawu na kati ya Ndinga ya Nge. Mpe mu—mu ke na kubakula ve. Ntangu Mpeve-Santu ke na kubwa na zulu ya bakala *yayi*, Mpeve-Santu ke na kubwa na zulu ya bakala *yina*, mpe mosi ya bawu kele santu mpe yankaka kele muntu ya luvunu. Mpe mu zaba ti ya kele yawu.” Mu zaba yawu. Kukondwa. . . Mu vwandaka zola kunata na ngaanda bakala yango mpe kulakisa yawu na yandi, to kubokila yandi na ngaanda mbala mosi kuna mpe kutuba na yandi yawu.

⁵⁹ Mutindu mu zolaka sala na muntu yina vwandaka awa mazono na mpimpa, yandi vwandaka kima ve kasi muntu ya luvunu, kana ya me vwandaka ntete na mosi ya kuvwanda kuna. Mpe mu zolaka zonza yawu, kasi yandi zolaka telama mpe zolaka banda na kudasuka. Na yawu mu bikaka kaka yawu, samu ya vwandaka lukutakanu, kasi mu zabaka yandi. Yinga, tata.

Ya vwandaka na mosi, zole ya bawu, ya kuvwanda kaka kuna na manima, mpimpa yankaka yina, ba kele ya dibuundu mosi awa na kati ya mbanza. Masawula ya nene! Mu monaka bawu. Kasi, kana beno meka, mambu me banda. Mu me salaka yawu bambala mingi. Mu ke bikaka kaka bawu, beno me mona. Ya kele nyonso ya kulunga. Nzambi zaba, Yandi kele Zuzi. Ti bawu kubokila munu mbala mosi, mpe kuna beno ke mona yina ke salama, beno me mona, ti yandi sala yawu.

Mutindu mpeve ya yimbi, ata mbala mosi ve ti mu me basisaka mpeve ya yimbi. Yandi ke kwiza kaka na munu mpe ke telemina munu. Kuna kele ntangu Nzambi ke kotaka na kisalu, beno me mona, ya kele ya kulunga, mpe beno me monaka yina me salamaka. Mbote mingi. Kasi mu ke bikaka kaka yawu. Lukutakanu kumaka mpasi mingi, samu ti mpeve yango

vwandaka kwiza mbala mosi na munu ntangu nyonso, beno me mona. Mpe na yawu mu landilaka kaka.

⁶⁰ Kasi awa, babakala yayi, mu vwandaka bakula yawu ve. Mpe ya vwandaka bamvula zole na ntuala, to tatu, ntangu mu vwandaka na Green's Mill, na Indiana, awa, na kisika ya ba-scouts. Mu vutukaka na cave ya ntama kisika mu ke kwendaka na kusambila. Mpe kuna, mu tubaka, "Mfumu, mu ke na kubakula ve yinki me kuma nkonga ya bantu yango. Bantu ya kulutila mbote yina mu me kukutanaka ntete ve na luzingu ya munu, mpe mu—mu ke na kubakula ve mutindu ti ya lendaka vwanda mpeve ya yimbi. Ntangu ya kele. . .kana na yina. . . Nge zaba kusungama ya ntima ya munu. Nge zaba mutindu mu zola Nge mpe mutindu mu me sadila Nge. Mpe Mpeve mosi yina kele awa, na munu, vwandaka na bantu yango. Mpe awa Yawu vwandaka na zulu ya bakala yina, kuna, kaka mosi." Na yawu mu vwandaka bakula ve.

⁶¹ Mpe Mfumu me kulumuka na kyadi ya Yandi mpe me lakisa munu. Yawu yayi kisika ya vwandaka. Ya fwana vwanda na Masonuku, na ntete. Yandi me tuba "Baka Biblia ya nge." Mpe mu me baka Biblia ya munu. Mu banza ti mu simbaka Biblia yango baminuti kumi kukondwa muntu. . .ata Dyambu yankaka kukwiza. Mu me vingila kaka bantangu fyoti. Mu me kuwa Yandi kutuba dyaka, "Baluka na Hébreux 6 mpe banda na kutanga." Mpe mu salaka yawu. Mpe ntangu ya kumaka na yisi kuna, kisika Yawu kele ya kutuba, "Mvula ke kubwaka konso ntangu na zulu ya ntoto samu na kupesa yawu maza mpe kubongisa yawu, kukubika yawu samu na yina ya kele. . .kasi matiti ya bansende mpe matiti ya bansende, yina ba me kubika na kulosa, nsuka ya yawu kele kutula na tiya." Mpe mu bakulaka yawu kaka kuna.

Mu banzaka, "Yawu yayi. Matondo kuvutuka na Nzambi! Yawu yayi." Beno me mona?

⁶² Ntangu yayi, Yesu tubaka, "Kikuni kwendaka na kumwanga bambuma," Yandi tubaka yawu ve? Ntangu yayi, beno nyonso kele Baklisto awa. Bantu nyonso vwandaka me telemisa maboko ya bawu, na mutindu nyonso, bantu ya Pentecote, Baklisto ya kubutuka mbala ya zole. Mbote mingi. Bawu. . .Mpe Yandi tubaka, "Kikuni kwendaka, na kumwanga bambuma. Mpe na yina yandi lalaka. . ." Kupema ya yandi, lufwa, na kati-kati. Beno me mona? "Mpe na yina yandi lalaka, mbeni mosi kwizaka mpe mwangaka matiti ya yimbi na bilanga yango." Yinki kele matiti ya yimbi? Matiti ya yimbi, ya bansende mpe nyonso. Ntangu yayi, "Mpe ntangu kisadi-bilanga (mulongi) kumonaka matiti ya yimbi yayi kukula, yandi tubaka, 'Mu ke kwenda katula yawu.' Yandi tubaka, 'Ve, ve. Nge ke katula mpe blé. Bika bawu kukula kintwadi.'"

⁶³ Ya kele na bilanga ya blé na ngaanda awa. Ya kele na bayinti

yina ke tambulaka, ba-ortie, matiti ya yimbi ya bandonki, nyonso yankaka na kati ya yawu. Ya kele kieleka? Kasi, ntangu yayi, na kati kuna ya kele na blé. Ntangu yayi, mvula ke kubwaka konso ntangu na zulu ya ntoto, samu na kupesa yawu maza. Ntangu yayi, mvula kele samu na yinki? Ve samu na kupesa masa na ortie. Ntangu yayi beno tala mbote mpe beno vwanda na bukebi. Ve samu na kupesa maza na yinti yina ke tambulaka. Mvula me fidisama samu na blé, kasi ortie mpe dititi ya yimbi kele kaka na nsatu ya masa mutindu mosi na blé. Mpe mvula mosi yina ke kubwa na zulu ya blé ke kubwa na zulu ya dititi ya yimbi. Mpe mwa dititi ya yimbi ya ntama yina ke telama kaka mutindu yina, mpe ke vwanda na nsayi mpe ke kembila, mutindu kaka mwa blé yina ke telama mpe ke vwanda ya kutelama yandi mosi.

⁶⁴ “Kasi na bambuma ya bawu beno ke zaba bawu.” Beno bawu yayi. Beno me mona? Ntangu yayi, Mpeve-Santu mosi lenda sakumuna muntu ya luvunu. Yina me ningisa ndambu ya beno ba-Arminien, kasi ya kele Kieleka. Ya kele Kieleka. Ba longaka beno busantu, mu ke kwikilaka na busantu, mpe. Kasi Mpeve mosi, mvula ke kubwaka na muntu ya kudedama mpe na muntu ya kudedama ve, kasi na bambuma ya bawu beno ke zaba bawu.

⁶⁵ Kana mu tala na ngaanda awa mpe ti mu kwenda baka blé, mu kuzwa blé, kasi matiti ya yimbi kele nyonso ya kukangama kintwadi. Mpe bawu ke zinga na nzila ya mvula mosi yina kubwaka samu na blé. Mpe mvula kufidisamaka ve samu na matiti ya yimbi, yawu kufidisamaka samu na Blé. Kasi mvula na kuvwandaka na bilanga, blé na kuvwandaka . . . matiti ya yimbi na kuvwandaka na bilanga ya blé, kuzwaka kaka ndandu ya mbote ya mvula mutindu bawu nyonso kuzwaka. Mpe mvula mosi yina salaka ti blé kuzinga, salaka dititi ya yimbi kuzinga.

⁶⁶ Bima nyonso na yinza ke fwanikisa kimpewe, mutindu beto ke longisaka. Yawu yina, bampeve ya yimbi, bampeve ya yimbi yina ke na kumeka na kulanda Buklisto, dyaka, na lusakumunu. Ya kele ve miliki ya mpamba, bankundi, kana beno baka yawu. Beno me mona? Beno me mona? Ntangu yayi, ya kele—ya kele Kieleka.

⁶⁷ Na yawu, mu kele ya kuvuuka ve bubu yayi samu ti mu lenda boka. Mu kele ya kuvuuka ve samu ti mu ke na kutala mutindu mu kele ya kuvuuka. Mu kele ya kuvuuka samu ti mu me sala misiku ya Biblia ya Nzambi yayi. Yesu tubaka, “Yandi yina ke kuwa Bandinga ya Munu mpe ke kwikila na Yandi yina fidisaka Munu, ke na Luzingu ya seko, mpe ke luta na lufundusu ve, kasi me luta lufwa na Luzingu.” Mu ke kwikilaka yawu. Ya kele kieleka. Mpe landila misiku yango mu kele ya kuvuuka, samu ti Nzambi me tuba yawu.

⁶⁸ Kana yandi tubaka na munu ti nge kele ya kuvuuka samu ti muntu ke tuba, “Mupepe ya ngolo me bula munu na kizizi,”

ya kele mbote mingi, kasi mu zola kuzaba kisika mupepe yango ya ngolo me katuka ntete yawu kubula munu na kizizi, beno me mona. Ntangu yayi, wapi mutindu ya luzingu beno ke zinga na manima mupepe yango ya ngolo kubula beno? Beno me mona? Beno me mona, ya kele na mbuma ya nge ti nge ke zabana. Na yawu, bampeve ya yimbi lenda sala kaka na kati-kati ya Baklisto. Beno ke kwikila yawu? Beno tala Paul, Paul tubaka . . .

⁶⁹ Ntangu yayi awa kele kisika Mvula ya Kilumbu ya Nsuka . . . Kana ya kele na mosi ya beno awa, beno lemvočila munu kana mu ke na kutuba dyambu yina kele mutindu mosi ve na beno. Mu ke tuba dyaka ve yina kele ya kuswaswana na beno kulutila ve na yina mu lenda tuba na Bimvuka, to nyonso, ba-Baptiste, to muntu nyonso yankaka. Ya kele Kieleka yina kele Kieleka. Kisika beno vwandaka me baluka, vwandaka yayi: beno ke na kubasisa bapofete na kati ya bantu yayi mpe bima yina kele ve bupofete. Bupofete kele ve samu “ba me tentika maboko” mpe ti ba me fidisa. Bupofete kele ya kubutuka. Beno me mona? Na kati ya Biblia, ya kele na *dikabu* ya profesi. Ya kele kisika beno salaka kifu, luswaswanu ya dikabu ya profesi mpe profete. Dikabu . . .

⁷⁰ “Nzambi, na bambala mingi mpe na mitindu mingi kuzonzaka na batata na nzila ya bapofete, na bilumbu ya nsuka yayi na nzila ya Mwana ya Yandi, Klisto Yesu.” Mpe Nzutu ya Klisto kele na makabu yivwa ya kimpeve yina ke salaka na yawu. Mpe ya lendaka vwanda na zulu ya kento *yayi* na nkokila yayi, profesi, kasi lendaka vwanda ata mbala mosi ve luzingu ya yandi nyonso. Ya lendaka vwanda na zulu ya kento *yayi* mpimpa yina ke landa. Lendaka vwanda na zulu ya bakala *yayi* kilumbu yankaka. Lendaka vwanda na zulu ya yandi *yina* kele kuna na manima, kilumbu yankaka. Yina ke sala yandi ve profete, ke sala muntu ve profete. Ya kele dikabu ya profesi na kati ya beno.

⁷¹ Mpe ntete bakala yango to profesi yango kupesama na dibuundu, ya fwana kufundisama na ntwala ya bazuzi ya kimpeve zole to tatu. Ya kele kieleka? Landila, ntangu yayi, Paul tubaka, “Benoni nyonso lendaka pesa profesi, mosi na mosi.” Kana dyambu kumonana na yandi *yayi*, ti yankaka *yina* kuvwanda swi. Mbote, yina ke sala nkonga nyonso kukuma bapofete kuna, landila malongi ya bubu yayi. Ve, dibuundu ya Pantekote, beto me vukisa bima nyonso. Mpe ya kele samu na yina Nzambi lenda ve kukwiza na kati, tii beto ke nata kima yango na kusungama mpe landila Biblia. Ya kele kieleka. Benoni fwana kubaka nzila ya kulunga. Wapi mutindu beno lenda tunga yinzo kukondwa kutala dikani? Benoni me mona? Benoni fwana kubanda mbote.

⁷² Ntangu yayi, kuna, profete, ata mbala mosi ve ti beno monaka muntu kutelama na ntwala ya Ésaïe, Moïse. Mosi kutelamaka, Koré, kilumbu mosi, mpe vwanda meka na kuswana na yandi, mpe Nzambi tubaka, “Benoni kabuka, Mu ke fungula ntoto mpe . . .” Ba ke butukaka profete. “Makabu

mpe bambokololo...-kondwa kuvutuka.” Ya kele nsololo ya Nzambi, katuka bumwana. Nyonso vwandaka ya kulunga ntangu nyonso, kaka yina yandi vwandaka tuba vwandaka kieleka mpe pesamaka kimbangi mpe vwandaka ya kulakisa. Ya kele Ndinga ya Nzambi, yina ke kwizaka na profete. Kasi dikabu ya profesi kele na kati ya dibuundu.

⁷³ Ntangu yayi beno ke tuba, “Mbote, bapofete ya kele na Ngwisani ya Ntama.” Oh, ve! Na Ngwisani ya Malu-malu ya vwandaka na bapofete.

⁷⁴ Agabus vwandaka—vwandaka profete ya Ngwisani ya Malu-malu. Beno tala Mpeve ya profesi yina kubwaka kuna mpe tubaka na Paul yina ya vwandaka. Na manima me kwiza Agabus yina katukaka na Jérusalem, mpe yandi talaka Paul, mpe kangaka mukaba ya yandi na luketo ya yandi, mpe balukaka mpe tubaka, “MUTINDU ME TUBA MFUMU, muntu yina me lwata yayi ba ke kanga yandi miniololo ntangu yandi ke kuma na Jérusalem.” Agabus, yandi yina telamaka kuna mpe tubaka, zabisaka na ntwala yinki zolaka salama, yandi vwandaka profete, ve muntu na dikabu ya profesi.

⁷⁵ Mpe dikabu ya kubeluka ya nzutu mpe makabu nyonso yina, nkundi ya munu ya Pentecote, beno me vukisa yawu nyonso. Makabu kele na kati ya dibuundu, muntu nyonso na dibuundu lenda kuzwa yawu, muntu nyonso yina me botama na kati ya Nzutu. “Na nzila ya Mpeve mosi beto nyonso kele ya kubotika.” Mpe Biblia ke tuba . . .

“Mbote, mu kele na dikabu ya kubeluka ya nzutu.”

⁷⁶ Mbote, Biblia ke tuba, “Beno fungula yimbi ya beno na mosi na mosi, mpe beno sambila samu na mosi na yankaka.” Muntu nyonso kusambila na mosi na mosi. Beto kele ve nkonga ya kukabwana; beto kele ya kuvukana, nkonga ya kuvukana. Beno me mona?

Ntangu yayi, mpe ya kele mutindu yina bampeve ya yimbi bantangu yankaka ke salaka.

⁷⁷ Ntangu yayi beno tala mbote yina Paul kutubaka, “Kana mosi ke na kuzonzaka na ndinga ya malu-malu mpe ti yankaka kutendula, mpe ti nyonso yina yandi ke tuba, ti ba fundisa yawu ntete—ntete ti dibuundu kuzwa yawu.”

⁷⁸ Ntangu yayi, ya ke vwanda ve kitini ya Masonuku, to kima yankaka mutindu yina. Nzambi ke vutukilaka ve Yandi mosi. Kasi ya ke vwanda malongi samu na dibuundu. Kuna kana bazuzi ya mbote kutuba, “Ti beto kuzwa yawu. Mbote, ya vwandaka ya Mfumu.” Muntu ya zole ke tuba, “Ti beto kuzwa yawu.” Na yinwa ya bambangi zole to tatu, ti konso dyambu kundimama. Na manima dibuundu me kuzwa yawu mpe ke kwenda yilama samu na yawu. Kana yawu kusalama ve, yina ba tubaka, kuna beno kele na mpeve ya yimbi na kati-kati ya beno. Ya kele kieleka. Mpe kana yawu kusalama, kuna beno tonda

Nzambi, Mpeve ya Nzambi kele na kati-kati ya beno. Beno me mona? Ntangu yayi, ya kele kisika beno fwana tala mbote mpe fwana sala keba. Na yawu, beno meka ve na kusala ngolo. Mu lenda ve kusala munu mosi meso kukuma ndombi na yina mu kele na ya bleu, beno me mona, mu fwana kusepela na meso ya bleu. Ntangu yayi, ya kele kisika bampeve ya yimbi ke salaka na kitezo ya bantu ya kimpeve.

⁷⁹ Ntangu yayi beto kele na kima ya mudindu yina ke na kwiza awa, mpe mu banza ti ya kele ya mudindu mingi ve. Ntangu yayi na ya Ntete ya Samuel 28, mu zola kutanga mwa Masonuku awa kaka na ntangu yayi. Mu zola beno kuwa mbote. Mpe mu zola kunata “bampeve ya yimbi,” kulakisa beno mutindu bawu ke salaka kaka na kati ya dibuundu, mpe mutindu Satana kele na kulanda na kusala konso kima ya kieleka yina kele. Ntangu yayi beno lenda mona, landila Biblia, ti bampeve ya yimbi ke kwizaka na kati-kati ya Baklisto mpe bawu ke kumekula.

⁸⁰ Mpe bambala mingi beto vwandaka me ndima ti bantu kele Baklisto na yina bawu tubaka, “Mu ke kwikila na Yesu Klisto.” Beno tala, bampeve ya yimbi ke kwikilaka kima mosi, mpe bawu ke tekitaka. Yina kele ve kidimbu ti beno kele ya kuvuuka. Mosi ya bampimpa yayi mu zola kuzonzila na nsololo, mpe kuna beno ke mona yinki zola tuba mpulusu. Beno me mona? Ya kele kima ve beno kuzwaka na kusala na yawu, na kubanda, to na kusukisa, to kima ve beno lenda sala na yawu. Nzambi ke vulusaka muntu, kukondwa kulomba kima. Mwana, yina me kota na mudindu, mutindu yina ve? Ntangu yayi, ya kele mbote ti beno kubasisa yawu na mutindu ya beno, na yina beto kele na zulu ya yawu. Mbote mingi.

⁸¹ Abraham vwandaka kubanda ya lukwikilu ya beto. Ya kele kieleka? Oh, Abraham vwandaka na nsilulu. Mpe Nzambi kubokilaka Abraham samu ti yandi vwandaka muntu ya nene, mu banza? Ve, tata. Yandi basikaka na Babylone, na—na yinsi ya Chaldée, na mbanza ya Ur, mpe Nzambi kubokilaka yandi mpe salaka ngwisani ya Yandi na yandi, kukondwa kulomba kima. “Mu ke vuukisa nge. Mpe kaka nge ve, Abraham, kasi Nkuna ya nge,” kukondwa kima.

⁸² Nzambi salaka kiwisa na muntu, mpe muntu ke pasulaka kiwisa yango ntangu nyonso. Ata mbala mosi ve ti muntu me kangamaka na kiwisa ya yandi na Nzambi. Ata mbala mosi ve ti ba kukangamaka na musiku. Ba vwanda lenda ve na kukangama na musiku. Klisto kwizaka mpe kufwaka musiku, Yandi mosi, samu ti lemvo kubikaka yimeni Mvulusi. Moïse kubikaka mutindu ya kutinina, mpe na manima mutindu ya kutinina, na kisika, mpe na manima bantu, na manima ya yina, ba vwandaka sosa dyaka kima ya kusala. Muntu ntangu nyonso zola kusala kima samu na kuvuukisa yandi mosi, na yina beno lenda ve kusala yawu. Ya kele nkadulu ya yandi. Na yina kaka yandi talaka ti yandi vwandaka kinkonga, na nsaba ya Éden,

yandi salaka mikaba na mwa matiti ya bafike. Ya kele kieleka? Kasi yandi talaka ti ya ke simba ve. Kima ve muntu lenda sala yina lenda vulusa yandi mosi. Nzambi ke vulusaka beno, kukondwa kulomba kima, nzila nyonso ya nsungi. Mpe kuna ntangu beno kele ya kuvuluka, beno kele ya kuvuluka.

⁸³ Beno tala Abraham. Kuna muntu yina vwandaka, yandi kwendaka kuna, mpe Nzambi pesaka yandi yinsi ya Palestine mpe tubaka na yandi na kukatuka kuna ve. Juif nyonso yina vwandaka bika Palestine vwandaka retrograde. Nzambi tubaka na yandi na kuvwanda kuna. Kana Nzambi kutuba na beno na kusala kima yankaka, mpe ti beno kusala yawu ve, kuna beno kele muntu yina ke vutuka manima. Ya kele kieleka? Mbote mingi, kukawuka kukwizaka, samu na kumeka lukwikilu ya Abraham. Mpe Abraham na kisika ya kuvwanda kuna, ve, yandi lendaka ve na kuvwanda kuna, yandi kimaka, mpe bakaka Sarah mpe kwendaka na kutala bakilometele bankama yiya na makumi nana na tatu (mu zolaka zola kuzwa ntangu samu na kukota na yawu) tii na yinsi yankaka.

⁸⁴ Mpe na yina yandi kukumaka kuna, mpe kuna ya vwandaka na ntinu ya nene yayi kuna, Abimélech. Yandi vwandaka ntwenya ya bakala mpe yandi vwandaka sosa dikangu, na yawu yandi talaka kento ya Abraham, Sarah, mpe zolaka yandi. Mpe Abraham tubaka, “Ntangu yayi, nge tuba na yandi ti nge kele mpangi ya munu ya kento mpe mu kele nkazi ya nge.”

⁸⁵ Na yawu yina sepelisaka Abimélech, na yawu yandi tubaka, “Mbote, beto ke nata kaka yandi na yinzo ya ntinu.” Mpe mu banza ti bakento kukubikaka yandi, mpe yandi zolaka kwela yandi kilumbu yina vwandaka landa.

⁸⁶ Mpe Abimélech vwandaka muntu ya mbote, muntu ya kusungama. Mpe na mpimpa yango, na yina yandi vwandaka lala, Mfumu monikaka na yandi mpe tubaka, “Nge kele kaka mbote mutindu muntu ya kufwa.” Yandi tubaka, “Bakala ya . . . Kento yina nge ke na kuzola na kukwela kuna, kele kento ya muntu yankaka.” Ntangu yayi beno tala mbote. “Kento ya bakala yankaka.”

⁸⁷ Kasi, yandi me tuba, “Mfumu, Nge zaba kusungama ya ntima ya munu,” muntu ya kusungama, ya santu. “Nge zaba kusungama ya ntima ya munu. Muntu yina me tuba na munu ti yina vwandaka mpangi ya yandi ‘ya kento.’ Mpe ti yandi ve kutubaka na munu, yandi mosi, ti yina vwandaka ‘mpangi ya munu ya bakala’?”

⁸⁸ Yandi tubaka, Nzambi tubaka, “Mu zabaka kusungama ya ntima ya nge, mpe ya kele samu na yina mu me zola ve ti nge kusumuka na ntwala ya Munu. Kasi yina kele profete ya Munu!” Alleluia!

⁸⁹ Nani yandi vwandaka? Muntu yina vutukaka manima, mpe mwa, muyibi ya luvunu. Ya kele kieleka? Oh, ve, ya kele ve

na mwa baluvunu ya mpembe. To ya kele baluvunu ya ndombi to ya kele ata fyoti ve baluvunu. Muntu yina vwandaka kuna vwandaka tuba kaka luvunu, na kutubaka ti yina vwandaka ya yandi “mpangi ya kento” na yina ya vwandaka kento ya yandi, yandi bakaka banzila yankaka, mpe vutukaka manima.

⁹⁰ Mpe awa vwandaka ya kutelama muntu ya kusungama na ntuala ya Nzambi, mpe tubaka, “Mfumu, Nge zaba ntima ya munu.”

⁹¹ “Kasi Mu ke kuwa ve bisambu ya nge, Abimélech, kasi baka yandi. . . vutula yandi mpe ti yandi kusambila samu na nge. Yandi kele profete ya Munu; Mu ke kuwa yandi.” Yinga, muntu yina me vutuka manima, muntu ya luvunu, kasi, “Ya kele profete ya Munu.” Ya kele Kieleka? Yina kele Biblia.

⁹² Ntangu yayi, beno kwenda ntama mingi ve na yawu awa na lweka ya ba-Calviniste, “Mbala mosi na lemvo, ntangu nyonso na lemvo,” samu ti beno ke kota na nkondolo ya lemvo. Beno me mona? Ntangu yayi, mwa minuti fyoti, beto ke kuzwa ntangu na sabala yayi samu na kuvutukila yawu mpe kulakisa beno mutindu ya kele kieleka. Kasi beno banza kaka ve ti samu beno me sala kima ya yimbi ti ya beno yimeni. Beno kele mwana ya Nzambi, beno kele ya kubutama na Mpeve ya Nzambi, beno kele bana ya babakala mpe ya bakento ya Nzambi, mpe bambuma ke pesa yawu mosi kimbangi. Beno bawu yayi.

⁹³ Ntangu yayi, beto bawu yayi, ya kuvwanda na kati ya yinsi. Ntangu yayi, mu zola kutanga awa, na nzila ya 6.

Mpe ntangu Saül kuyufulaka MFUMU, MFUMU pesaka yandi mvutu ve, ata na ndosi, to na Urim, to na profete.

Mpe kuna Saül kutubaka na bisadi ya yandi, Beno sosila munu kento yina ke bokilaka bampeve, samu ti mu kwenda na yandi, mpe kuyufula yandi.

Mu lendaka bula kima kaka awa, samu na. . . “Beno sosila munu kento yina ke bokilaka bampeve.”

. . . Mpe kisadi ya yandi tubaka na yandi, Tala, ya kele na kento yina ke bokilaka bampeve na En-dor.

Mpe Saül kusobaka, mpe lwataka bilele, bilele yankaka, mpe yandi kwendaka, zole. . . mpe na bantu zole na yandi, mpe ba kumaka na kento yango na mpimpa: mpe bawu tubaka, mu ke lomba nge, . . . -kula samu na munu na nzila ya mpeve, mpe basisa munu. . . , muntu yina mu ke lomba nge.

Mpe kento tubaka na yandi, Tala, nge zaba ti Saül me sala, nge zaba, yandi me katula bayina nyonso ke bokilaka bampeve, mpe. . . bambikudi, na yinsi: na yawu. . . nge ke na kusala luzingu ya munu mutambu, mpe zola mu kufwa?

Mpe Saül vutulaka, kudyaka ndefi na MFUMU, na kutubaka, Mutindu MFUMU kele moyo, ya ke vwanda ve na ndola samu na nge . . .

Na yina kento tubaka, Nani mu fwana basisa . . . nge? Mpe yandi tubaka, Basisa munu Samuel.

Mpe ntangu kento monaka Samuel, yandi tubaka na ndinga ya ngolo: mpe kento me zonza na Saül, na kutubaka, Samu na yinki nge me vuna munu? samu ti nge kele Saül.

Mpe ntinu me tuba na yandi, Kuvwanda na boma ve: yinki nge me mona? Mpe kento tubaka mu . . . na Saül, mu me mona banzambi kumata na ntoto.

Mpe yandi tubaka na yandi, Wapi mutindu yandi vwandaka? Mpe yandi tubaka, Kiboba mosi ya bakala me mata; mpe yandi kele ya kufukila kazaka. Mpe Sam- . . . (Kieleka, yina kele kazaka ya profete yango. Beno me mona?) . . . zabaka ti ya vwandaka Samuel, mpe yandi telamaka na . . . mpe na kizizi ya yandi na ntoto, mpe fukamaka.

Mpe Samuel tubaka na Saül, Samu na yinki nge me kwamisa munu, mpe me matisa munu? Mpe Saül kuvutulaka, mpe tubaka, mu ke na dyambu ya mawa; samu na ba-Philistin ke na kusala mvita na munu, mpe Nzambi me katukila munu, mpe ke na kupesa munu mvutu ve, ata na nzila ya profete, ata na ndosi: na yawu mu . . . bokila na nge, ti nge ke zabisa munu yinki mu fwana sala.

Mpe kuna Samuel me tuba, Samu na yinki . . . nge ke yufula . . . munu, na kumona ti MFUMU me katukila nge, mpe—mpe me kuma mbeni ya nge?

Mpe MFUMU me sala na yandi, mutindu yandi zonzaka na munu: samu ti MFUMU me botula kimfumu ya yandi na maboko ya nge, mpe me pesa yawu mpe . . . David:

⁹⁴ Ntangu yayi, mingi ya beno, kele ya kuzaba yayi mbote. Ntangu yayi beto zola kukota mbala mosi na kati, mpe ti Nzambi kusadisa beto ntangu yayi, na mwa ntangu fyoti, na kukota na yayi. Ntangu yayi beno tala mbote. Ya vwandaka na muntu, Saül, yina vwandaka mbala mosi ya kuzabana profete, samu ti yandi vwandaka pesa profesi na baprofete. Ya kele kieleka, milongisi? Ntangu yayi, awa muntu yango vwandaka me vutuka manima. Ya kele kieleka? Kasi beno bambuka moyo kisika Samuel tubaka ti yandi ke vwanda, na yandi, na kilumbu yina vwandaka landa. Yandi kwendaka ntete ntangu kulunga, beno me mona. Mbote, kana beno kuwa Nzambi ve, Nzambi ke katula beno na ntoto.

⁹⁵ Beno tala na mukanda ya Corinthiens kuna, mutindu Paul sungikaka bantu yango. Yandi tubaka, “Ntete, mu ke tonda

Nzambi samu na beno, ti ya kele ve na bima ya mutindu yina na kati-kati ya beno, mpe nyonso yina, mpe mutindu ti—ti ata dikabu ya kimpeve me kondwa na beno.” Yandi vwandaka tuba na bawu, kisika ya bawu, na Klisto. Na manima yandi me banda na kusemba bawu, kutuba na bawu na bakento ya bawu ya milongi, mpe mutindu ba vwandaka sala, mpe mutindu ba vwanda kudya na mesa ya Mfumu.

Mpe muntu mosi vwandaka zinga na kento ya tata ya yandi, mpe yandi tubaka samu na muntu yayi na Klisto, “Beni yekula yandi na dyabulu, samu na kubeba ya nzutu, ti mwela kuvuuka.” Beni me mona, kaka yina, beni yekula yandi. Biblia ke tuba, “Samu na yayi mingi kele ya kubela mpe kele na banzutu ya kulemba na kati-kati ya beni, mpe ti mingi me kufwa,” me kwenda ntete ntangu kulunga samu na disumu. Nzambi me baka beni na nzila; kidimbu ya mbote ti beni vwandaka Muklisto, kana ba me baka beni.

⁹⁶ Na yawu, ntangu yayi beni tala awa, Saül vwandaka ya kuzabana mutindu mosi ya bapofete, to mosi na kati-kati ya bapofete, samu ti yandi vwandaka pesa bapofesi. Mpe ntangu yayi yandi vwandaka me vutuka manima, samu ti yandi tumamaka ve na Nzambi, mpe kimfumu ya yandi kubotulamaka na maboko ya yandi mpe kutulamaka na diboko ya David, yandi yina Nzambi kukusaka na nzila ya Samuel, na mbungu ya mafuta.

⁹⁷ Beni tala, kuna, ya vwandaka na mitindu tatu yina vwandaka na bawu na kuzaba mambu ya Nzambi; ya ntete vwandaka—vwandaka profete, ya zole vwandaka ndosi, mpe ya tatu vwandaka Urim Thummim. Mpe ata mosi ya bawu zolaka na kupesa mvutu. Ntangu yayi, beni zaba yinki profete kele, beni zaba yinki ndosi ya kimpeve kele, mpe beni zaba yinki Urim Thummim vwandaka. Beni zaba, kilumbu yankaka mu yufulaka muntu mosi—mosi na yina me tala Urim, mpe muntu yango lendaka ve na kutuba na muni yinki ya vwandaka, Urim Thummim. Samu ti, ya vwandaka Nzambi vwandaka pesa mvutu na nzila ya bayayi. Beni me mona?

⁹⁸ Mpe dyabulu ke salaka na kulanda na kusala mosi na mosi ya bima yango; mbikudi, profete ya luvunu, mpe kubakula mambu na nzila ya kitala-tala. Beni me mona?

Ntangu yayi, Urim Thummim vwandaka vwanda na zulu ya ntulu ya Aaron, awa, mpe Urim Thummim vwandaka fuka yawu na matadi. Mpe ba vwandaka tula yawu na kati ya tempelo. Mpe na ntangu ba vwandaka na keti-keti, ba vwandaka kwenda na ntwala ya Nzambi, samu na mvutu, mpe nsemo vwandaka sema na Urim Thummim yango, kuna, kana ya vwandaka luzolo ya Nzambi, to ve. Ntangu yayi, ntangu Urim Thummim vwandaka pesa mvutu ve. . . Ntangu yayi, yina vwandaka mvutu ya mbala mosi ya Nzambi.

Ntangu yayi, Urim Thummim ya bubu yayi; mbikudi me baka mbumba ya moni-moni, me landa na kusala Yawu; kima ya luvunu. Nzambi kele na butatu; bangolo ya Nzambi kele na butatu. Mpe dyabulu kele na butatu, mpe bangolo ya yandi kele na butatu. Mpe mu lenda lakisa yawu na Biblia. Mpe ti Urim Thummim; vwandaka kaka mbumba ya moni-moni yina dyabulu ke na kusadila bubu yayi. Mpe profete ya luvunu ya awa bubu yayi, yina kele na beto ntangu yayi, vwandaka. . . To, ndoki, to mbikudi kuna, me baka kisika ya profete, na lweka ya dyabulu. Beno me mona yina mu zola tuba?

⁹⁹ Ntangu yayi, na yina, Urim Thummim bubu yayi kele Biblia yayi. Kana muntu me pesa profesi to ndosi, mpe ti ya me fwanana ve to me vutukila na Biblia ya Nzambi ve, ya kele luvunu. Beno kwikila yawu ve.

¹⁰⁰ Muntu mosi kwizaka na munu ntama mingi ve, yandi katukaka na Inde, kisika mu ke na kubikaka na kukwenda, mwa mulongi mosi ya mbote. Yandi tubaka, “Mpangi Branham, mu me kwiza awa.” Yandi tubaka, “Kento mosi vwandaka na Mpeve-Santu, mpe,” yandi tubaka, “yandi vwandaka kaka kento mosi ya swi, ya mbote mingi.” Yandi tubaka, “Mpe yandi kukwelanaka bambala yiya, mpe vwandaka zinga na bakala ya yandi ya yiya. Mpe mu tubaka, ‘Mbote, wapi mutindu ya lendaka vwanda, Mfumu?’” Mpe yandi tubaka, “Mu kwendaka na Yandi mpe tubaka, ‘Oh, nkembo na Nzambi!’ Mu tubaka, ‘Alleluia! Nkembo na Mfumu!’” Kaka mosi ya mutindu yina, beno zaba. “Mu tubaka, ‘Alleluia! Nkembo na Mfumu!’” Yandi tubaka, “Mfumu me tuba na munu, ‘Awa, mu ke pesa nge ndosi.’” Mpe yandi tubaka, “Mu lotaka ti kento ya munu, mu me mona yandi kuzinga na kati ya bizumba. Mpe yandi me vutuka na munu mpe me tuba, ‘Oh, nge lenda lemvočila munu, Victor? Nge zola kulemvočila munu? Mu. . .’ ‘Tala,’ mu tubaka, ‘kieleka, mu ke lemvočila nge mpe ke baka dyaka nge.’” Yandi tubaka, “Ntangu yayi, ya kele yina mu salaka.” Yandi tubaka, “Nge me mona, mu lemvočilaka.”

¹⁰¹ Mu tubaka, “Victor, ndosi ya nge vwandaka ya zola mingi, kasi dyabulu me pesa yawu na nge.”

Yandi tubaka, “Wapi mutindu?”

¹⁰² Mu tubaka, “Ya ke na kufwanakana ve na Ndinga ya Nzambi. Yandi ke na kuzinga na bizumba. Kieleka. Yandi lenda zinga ve na babakala yiya. Kieleka. Kana yandi bika yandi yayi mpe vutuka na ya ntete, yandi ke vwanda na kati ya yimbi kulutula kubanda. Yandi fwana zinga yandi mosi, luzingu ya yandi nyonso.” Mu tubaka, “Nge zaba ya ke na kufwanakana ve na Ndinga ya Nzambi. Na yawu kento. . . Ndosi ya nge vwandaka luvunu.” Mu tubaka, “Ya ke na kufwanakanaka ve na Yayi.”

¹⁰³ Mpe ntangu profete me pesa profesi, mpe ba me zonga, mpe zola kumona kana profesi yango vwandaka kieleka, ba

wwanda tula yawu na ntuala ya Urim Thummim. Mpe kana Ndinga ya Nzambi vwandaka sala Urim Thummim kulezima, kuna ya vwandaka kieleka, Kieleka. Mpe kana muntu kupesa mbangululu, kupesa ndosi, kupesa dyambu landila Biblia, mpe, to dyambu yankaka, mpe ti yawu kufwanakana ve na Biblia ya Nzambi, ya kele luvunu. Ya kele Urim Thummim ya bubu yayi. Ndinga ya Nzambi ke zonzaka, mpe ya kele mbala mosi Ndinga ya Nzambi, mutindu Urim Thummim vwandaka ntete ba kusonika Biblia. Amen! Alleluia! Mu ke kumitala musambidi malu-malu yayi. Beno tala munu ve fanatiki, kana ya kele yina beno ke na kusala. Mu zaba, mu zaba kisika mu kele. Mu kele na ntima na zulu ve. Ya kele kieleka.

¹⁰⁴ Yawu yayi Kieleka, Ndinga ya Nzambi! Mu ke kipe ve wapi mutindu ya ndosi beno me kuzwa, to wapi mutindu ya profesi beno me pesa, kana ya kele ve Ndinga ya Nzambi, ya kele luvunu, kana ya kufwanakana ve na Ndinga yango. Ya kele yina kele dyambu bubu yayi. Mosi kele na ndosi, mosi kele na vision, mosi kele na kuzonza ya bandinga ya malu-malu, mosi kele na luzayikisu; ya kele samu na yina bima nyonso kele ya kuvukana mpe nyonso, beno kele na ba-denomination mpe kukabuka ya nyonso. Beno fwana vutula yawu na fondasio ya nsuka, mpe yina kele Ndinga ya Nzambi. Ya kele kieleka.

¹⁰⁵ Mabuundu kele ya kutungama na zulu ya yina mosi, me tuba, “Oh, Yesu ke vutuka na zulu ya mpunda ya mpembe. Mu zaba. Mu me mona Yandi na vision.” Ba ke sala dibuundu ya mutindu yina. “Oh, alleluia! Yandi ke kwiza na zulu ya dituti.” Ba ke na kusala yawu na mutindu yina. Ba ke kabuka, mpe ke kabana, mpe ke bokila mosi na mosi “yinti ya kutelama ya ba-buse,” mpe “kisika ya kubumbama ya basidi,” mpe nyonso ya mutindu yina. Beno tala, mpangi, ya ke lakisa, na kubanda, ti ntima ya beno kele ya kulunga ve na Nzambi ntangu beno ke sala yina. Ya kele kieleka. Beto kele bampangi. Beto fwana wwanda kintwadi mosi na mosi. Beto ke na nsatu ya mosi na yankaka.

¹⁰⁶ Ntangu yayi beno tala. Saül kuvutukaka na manima, mpe yandi kwendaka kuna. Yandi, Nzambi, balulaka kizizi ya Yandi na yandi. Mpe yandi kwendaka mpe yandi yufulaka baprofete. Baprofete kwendaka mpe mekaka na kupesa profesi, mpe Nzambi zengaka, zolaka ve kupesa vision. Profete basikaka, tubaka, “Mu ke na kulendaka ve. Ve. Ata mbala mosi ve ti Yandi me tuba na munu dyambu samu na nge.”

¹⁰⁷ Mbote, na yina yandi tubaka, “Mfumu, pesa munu ndosi.” Mpimpa na manima ya mpimpa, ata ndosi mosi ke kwiza.

¹⁰⁸ Na manima yandi kwendaka na Urim Thummim, mpe yandi tubaka, “O Nzambi! Mu me meka na baprofete, Mu me meka na bandosi, ntangu yayi Nge sadisa munu. Nge zola kusala yawu?” Yandi me zenga, ata fyoti ya Nsemo kusemaka.

109 Na manima yandi kwendaka tala ndoki ya kento, muntu ya yisi, ya kubeba. Mpe yandi kwendaka na yandi, mpe yandi salaka nzila kuna mpe sobaka na kuvuna. Mpe kento ya ndoki yayi kubasikaka mpe bokilaka mpeve ya Samuel.

110 Ntangu yayi, mu zaba yinki beno ke na kubanza. Mingi ke tubaka, “Ya vwandaka ve Samuel.” Kasi Biblia ke tuba ti ya vwandaka Samuel, mpe ya vwandaka Samuel. Ya kele ngitukulu mutindu beno ke na kubakula yawu, ve? Kasi ya vwandaka Samuel. Biblia ke tuba ti ya vwandaka yawu.

111 Mpe ndoki ya kento yango lendaka na kumatisa yandi, mpe yandi matisaka Samuel. Mpe Samuel vwandaka kisika mosi yankaka, kasi vwandaka zaba yinki vwandaka salama, mpe yandi vwandaka dyaka ya kulwata kazaka ya yandi ya profete. Na yawu, mpangi, ntangu beno ke kufwaka, beno kele ya kufwa ve, beno ke na kuzingaka kisika mosi, kisika mosi yankaka.

112 Bika mu telama mwa minuti fyoti, samu na kulakisa mbote yinki kele bampeve ya yimpi yayi mwa ndambu. Kento yango vwandaka mpeve ya yimbi, kasi yandi vwandaka na ngwisani mingi na mpeve ya yinza. Ntangu yayi, bubu yayi, ya kele na bantu mingi yina ke zonzaka na bampeve ya mafwa bayina zaba kieleka mingi na zulu ya yinza ya bampeve kulutula bantu yina ke zonzaka ti ba kele Baklisto, na kutala kento yango vwandaka mpeve ya yimbi. Na ntangu ya Biblia ya vwandaka mutindu mosi.

113 Ntangu Yesu vwandaka awa na ntoto, ya vwandaka na balongi mpe bantu ya mayela mingi mpe milongisi, na kati ya baya kulutula yina vwandaka, bayina basikaka na baseminere ya mbote mingi kulutula yina beto lenda basisa bubu yayi. Mpe bantu ya santu, ya kuzabana, ba zolaka vwanda. Kana ba vwandaka tala Levite, yandi zolaka vwanda muntu ya kufundisa ve, muntu ya kusungama na mutindu nyonso. Mpe dyaka muntu yango zabaka ata fyoti ve na yina me tala Nzambi kulutula lapin yina zaba na mapapa ya mvula ya mpembe. Ntangu Yesu kwizaka, yandi kondwaka na kuzaba Yandi, mpe yandi bokilaka Yesu “dyabulu.” Yandi tubaka, “Yandi kele Béélzébul, mwana ya ntinu ya dyabulu.” Ya kele kieleka?

114 Mpe awa me kwiza mpeve ya yimbi ya kitezo ya yisi, yina kangaka muntu mosi kuna na bantoni, mpe nyonso, mpe bawu kutubaka na ngolo. Dyabulu yandi mosi tubaka, “Beto zaba Nani Nge kele. Nge kele Mwana ya Nzambi, Muntu ya Santu.” Ya kele kieleka? Bandoki ya bakento mpe bambikudi, bampeve ya yimbi, zabaka Yandi Mwana ya Nzambi; na yina bayina longokaka, milongi ya théologie ya seminere zabaka ti Yandi vwandaka Béélzébul. Nani vwandaka na kieleka, dyabulu to mulongi? Dyabulu. Mpe, mpangi, ya me soba mingi ve bubu yayi. Ba ke na kuzaba ve ngolo ya Nzambi.

115 Ata lutangu ya malongi yina kele na beno, beno lenda bula na kukotisa yawu na beno. Nzambi kele ve na bampova ya nene. Nzambi kele na kati ya ntima ya kusungama. Beno lenda telama awa, kuzonza bampova ya nene, mutindu mu zaba ve, yina ke nata beno ve pene-pene ya Nzambi. Beno lenda telama mpe kusala mutindu ya kuvutukila dilongi ya beno mpe kutuba bima yayi, yina ke nata beno ve pene-pene ya Nzambi. Beno lenda longuka dictionaire tii beno ke lala na zulu ya mosi, mpe dyaka ya ke nata beno ve pene-pene ya Nzambi. Ntima ya kulemvuka, ya kupesama, na malembe, kele yina ke nata beno na Nzambi. Mpe yina kele kieleka. Amen! Ntima ya kulemvuka, Nzambi ke zolaka. Ntangu yayi, ata ti beno zaba ve ABC ya beno, yina ke sala ata luswaswanu ve. Kaka ntima ya kulemvuka! Nzambi ke zingaka na kati ya ntima ya kulemvuka; na ndongosolo ve, ya kele ve na balukolo, na théologie ve, baseminere, na bisika nyonso ya mutindu yankaka yayi ve; na bampova ya nene ve, to na bisika ya bitezo ya nene ve. Nzambi ke zingaka na kati ya ntima ya muntu. Mpe mutindu beno lenda kulumuka beno mosi, ya mpamba mingi, beno lenda kuma ya kulutila nene na meso ya Nzambi.

116 Bika mu pesa beno kima. Mu me mona bilanga ya beno ya kufuluka na ngaanda awa na blé. Ntangu nyonso yintu ya kufuluka ya blé ke tala kaka na yisi. Mwa dititi ke telama kuna, mpe ke ningana bisika nyonso mutindu ti ya zaba nyonso, ya kele na kima ve na kati ya yintu. Ya kele mutindu mosi na mingi ya bantu yayi yina ke banzaka ti ba kele na mingi na kati ya yintu, mpe kima ve na kati ya ntima ya bawu, na kutala. Yintu ya santu ke fukama na Ngolo, ke zaba Yesu Klisto mutindu Mwana ya Nzambi, mpe ke kwikila bisalu ya Yandi.

117 “Mpe Yandi kele mutindu mosi, mazono.” Oh, ba zabaka Yandi, kieleka, landila disolo. Kasi ya kele dyambu ya disolo ve. Bantu ke telama mpe ke tuba, “Oh, mu ke kwikila na Pantekote, ntangu ba vwandaka na kulosana ya nene mpe bima ya mutindu yina,” mpe ke fikula tiya. Muntu yina me kangama na madidi lenda ve kuzwa tiya na nzila ya kifikulu ya tiya. Kifikulu ya tiya lenda ve kupesa tiya. Ya kele yina ba vwandaka. Yinki ya kele bubu yayi, kana Yandi kele mutindu mosi mazono, bubu yayi mpe kukondwa nsuka? Yina kele tiya yina ba me fikula. Muntu yina ke na kufwa na madidi, ke tuba, “Beni tala tiya ya nene yina bawu me kuzwa.” Beto tala, yina lenda ve kupesa beno tiya.

118 Yina ba salaka na Pantekote, yina ba kuzwaka na ntonono ya Ngwisani, beto kele na yawu bubu yayi! Mpe na ntangu kaka Nzambi ke tula nyonso na nzila, mpe ti Dibundu kuvwanda kintwadi, Enlevement ke salama. Kana beto ke na kulenda kaka ve na kuzwa lukwikilu samu na kubeluka ya Kinzambi, beto bikaka kaka Enlevement, samu ti beto nyonso kele na kati ya muvusu, mosi mutindu *yayi* mpe mosi mutindu *yina*. “Mulongisi *Kingandi* tubaka ti Yawu kuvwandaka *yayi*. Mbote, mulongi ya

munu tubaka ti Yandi vwandaka *Yayi.*”

¹¹⁹ Mwa bilumbu me luta, kento mosi vwandaka tuba, “Yandi kele kaka muntu ya luvunu.” Yandi tubaka, “Nganga-Nzambi ya munu tubilaka munu yawu.” Mu ke zola ti nganga-Nzambi ya yandi yina kukwiza awa kilumbu, beto ke mona nani vwandaka muntu ya luvunu. Yinga. Beto ke mona nani kele muntu ya luvunu. Beno kwiza meka.

¹²⁰ Awa ntama mingi ve, na Harlingen, na Texas, beto vwandaka na lukutakanu kuna. Mpe ba vwandaka na bidimbu ya nene, bisika nyonso na matoma na mpimpa yango ntangu mu kwendaka kuna, yina vwandaka tuba ti FBI vwandaka kuna samu na kulakisa munu mutindu muntu ya luvunu. Na yawu mwa mwana mosi ya kento kubelukaka na Texas kuna kisika mosi. Yandi vwandaka na node, mpe, mu—mu banza ti, pene-pene ya bakilometele difunda mosi na bankama sambanu, na node pene-pene ya Panhandle. Mpe yayi vwandaka na sude na Harlingen, kuna na ndilu. Mpangi Baxter kwizaka, yandi tubaka, “Mpangi Branham,” yandi tubaka, “ata mbala mosi ve ti nge me monaka mutindu ya muvusu yina, na kutala bantu mafunda yiya to tanu.” Mpe yandi tubaka, “Mpe dyaka, bisika nyonso, FBI ke kwiza kanga nge na estrade na nkokila yayi, mpe ke lakisa nge.”

Mu tubaka, “Mbote, mu kele kieleka na kyese samu na yawu.”

¹²¹ Yandi tubaka, “Nge zaba mwa mwana ya kento yina belukaka mpimpa yankaka yina?”

¹²² Mu vwanda kota na yinzo na . . .vwanda kota na kati ya kivinga ya munu. Mu kuwaka kima kudila, mpe mu talaka bisika nyonso. Mu banzaka ya lenda vwanda ti muntu ba ke na kunwanisaka. Ya vwandaka mwana mosi ya kento. Mpe mu me tala na manima. Mu me tuba . . . Mpe mu me vutuka, mu me tuba, “Yinki kele dyambu, Mama?” Mpe ya vwandaka mwa bana zole ya bakento ya kutelama kuna, na kutala ya bamvula kumi na sambwadi, kumi na nana, mosi na mosi, maboko ya bawu ya kukanga mosi na yankaka, ke na kudilaka.

¹²³ Yandi tubaka, “Mpangi Branham!” Kuna mu zabaka ti ba zabaka munu. Yandi tubaka, “Beto, mu me nata yandi nzila nyonso awa.” Yandi tubaka, “Yandi fwana kwenda na lupitalu ya mambu ya yintu.” Mpe mwa mwana yango ya kento vwandaka na lukutakanu ya munu na Lubbock, na Texas. Mpe yandi tubaka, “Mu zabaka ti kana mu nata yandi awa mpe nge ke sambila samu na yandi, mu ke kwikila ti Nzambi ke belusa yandi.”

¹²⁴ Mbote, mu banzaka, “Wapi mutindu ya lukwikilu!” Mpe mu tubaka, “Mbote, ntangu yayi, mpangi ya kento, nge lenda . . .” Mpe kaka kuna mu tubaka, “Beno me kwiza tii awa na kati ya roadster ya tinta ya mwamba, ve?”

Yandi tubaka, “Yinga!”

Mpe mu tubaka, “Mama ya beno kele muntu ya kubela.”

Yandi tubaka, “Ya kele kieleka.”

Mu tubaka, “Nge kele ya dibuundu ya Méthodiste.”

Yandi tubaka, “Kieleka ya kele kieleka.”

125 Mpe mu tubaka, “Na nzila ya kukwiza, ditoma ya beno zolaka baluka. Nge na mwana ya kento yayi vwandaka seka na yina beno kumaka kisika ya vwandaka ndambu na sima mpe ndambu na asphalte, mpe beno vwandaka baka virage.”

Yandi tubaka, “Mpangi Branham, ya kele kieleka!”

Mu tubaka, “Mpe, MUTINDU ME TUBA MFUMU, mwana ya kento me beluka.”

126 Kilumbu yina vwandaka landa yandi vwandaka tiya, vwandaka tuba na muntu nyonso, vwandaka kwenda bisika nyonso samu na yawu. Samu ti, ba zabaka yandi ve kuna, kana yandi vwandaka mutindu yina to ve. Mpe na yina kilumbu yango mu. . . Mpangi ya bakala Baxter tubaka, “Mpangi Branham,” yandi tubaka, “bana ya bakento yango ke na kukangaka bifunda ya bawu.” Mpe yayi kele dyambu mosi yina yandi vwandaka zaba ve ti mu zabaka. Mbongo ya beto vwandaka ndambu mingi. Ata mbala mosi ve ti mu vwanda bika yandi kuzonzila na yawu. Kasi mosi ya bana ya bakento yayi kutulaka bankama yivwa ya ba-dollar na—na munkayulu na nkokila yina ntete yina, mpe yina kumisaka mbongo mingi. Ntangu yayi, yandi zabaka ve, yandi zabaka yawu ve kana ti bubu yayi, kasi mu zabaka yawu. Beno me mona? Ti munu. . . Nzambi tubaka na munu ti nyonso ke vwanda mbote.

127 Mpe Mpangi ya bakala Baxter tubaka, “Mpangi Branham,” yandi tubaka, “nge fwana bika munu kulomba fyoti.” Yandi tubaka, “Ba me kuzwa mwa minganga ya Kinzambi yayi awa yina me benda kaka bantu yayi.”

128 Mu tubaka, “Kima ve. Ve, tata. Nge ke sala yawu ve. Mpangi Baxter, ntangu kaka nge ke lomba mbongo mutindu yina, ya kele kilumbu nge na munu ke pesana maboko mutindu bampangi, mu ke kwenda munu mosi. Beno me mona?” Mu tubaka, “Nge sala yawu ve.” Mu tubaka, “Nzambi kele mfumu ya bibulu na funda ya myongo, mpe nyonso kele ya Yandi. Mu kele ya Yandi. Yandi ke keba na munu.”

Yandi tubaka, “Mbote mingi.”

129 Mpe nkokila kaka yina yandi tubaka, “Mpangi Branham, tala awa. Muntu. . . Tala awa! Awa kele na enveloppe na kati awa, ata nkumbu kele na zulu ya yawu, ya kele na babiye ya mbongo bankama yivwa ya ba-dollar na kati ya yawu. Kieleka kaka yina beto ke na nsatu samu na kulungisa mbongo.”

Mu tubaka, “Mpangi Baxter.”

Yandi tubaka, “Lemvokila munu.”

¹³⁰ Na yawu kuna mu zabaka ti ya vwandaka mwana ya kento yango. Na yawu kuna—kuna kilumbu yina vwandaka landa, Mpangi ya bakala Baxter tubaka, “Mpangi Branham, ba kele kuna ke na kukangaka bilele ya bawu, ke na kudilaka.”

Mu tubaka, “Yinki kele dyambu?”

Yandi tubaka, “Nge fwana kwenda kuna mpe kumona bawu.”

¹³¹ Mu kwendaka na kivinga kisika ba vwandaka. Mu tubaka, “Na wapi kivinga ba kele?” Mu kwendaka kuna mpe konkotaka na mwelo. Mu vwandaka kuwa bawu kudila. Mu konkotaka na kielo, mpe mwana ya kento me kwiza na mwelo, yandi tubaka, “Oh, Mpangi Branham, kieleka lemvokila munu.” Yandi tubaka, “Mu kele yina me natila nge dyambu nyonso yayi.”

Mu tubaka, “Dyambu? Yinki, mpangi ya kento?”

Yandi tubaka, “Oh, FBI kele na manima ya nge.”

Mpe mu tubaka, “Oh, ya kele kieleka?”

¹³² Yandi tubaka, “Yinga.” Yandi tubaka, “Mu banza ti mu me pesa mingi kimbangi bisika nyonso na mbanza bubu yayi, mpe nyonso.”

Mu tubaka, “Ve.”

¹³³ Mpe yandi tubaka, “Mpangi Branham, FBI kele kuna, kele kuna, ba ke lakisa nge na nkokila yayi.”

¹³⁴ Mu tubaka, “Mbote, kana mu—kana mu ke na kusala kima ya yimbi, ba fwana lakisa munu. Beno me mona?” Mu tubaka, “Kieleka. Kana kulonga Nsangu ya mbote ke na nsatu ba lakisa, mbote, beto sala yawu. Beno me mona?” Mu tubaka, “Mu—mu—mu ke zingaka na nzila ya Biblia yayi, mpe yina Biblia yayi ke tuba ve. . . Yayi kele yina ke nwanilaka munu, yayi awa. Beno me mona?” Mpe mu tubaka, mpe yandi. . .

Yandi tubaka, “Mbote,” yandi tubaka, “Lemvokila kaka munu samu na yina mu me sala.”

Mu tubaka, “Nge me sala kima mosi ve, mpangi ya kento.”

Yandi tubaka, “Mbote, nge kele na boma ve na kukwenda kuna?”

Mpe mu tubaka, “Ve.”

Yandi tubaka, “Mbote, FBI kele kuna.”

¹³⁵ Mu tubaka, “Mbote, ba kwizaka na lukutakanu ya munu na ntwala mpe ba vuukaka.” Mu tubaka, “Tata Al Farrar. . .”

¹³⁶ Capitaine Al Farrar, mingi ya beno zaba kundima ya yandi kuna na Tacoma, na Wahington, yandi kuvulukaka, kaka kuna na kisika ya kukubula. Yandi kwizaka na lukutakanu, yandi tubaka, “Mu me landa muntu yayi bamvula zole. Mpe mu kuwaka samu na dyambu ya mbongo, mpe mu vwandaka tala yawu mbote, mpe mu kwendaka bisika nyonso.” Mpe yandi

tubaka, “Ya kele Kieleka, beno ke na kuwa fanatiki ve na nkokila yayi, beno ke na kuwa Kieleka.” Yandi tubaka, “Mosi ya bantu ya bapulusu, mu salaka dokotolo kutala mwana ya yandi mpe mu fidisaka yandi na mulonga ya bisambu,” mpe yandi tubaka, “ba tubaka kaka kieleka na mwana yango yina vwandaka simba ve na yandi, mpe yina salamaka na yandi. Mpe yandi tubaka, ‘Na bilumbu nana yandi ke vutuka na lukolo, kimbevo ya buka-buka.’” Mpe yandi tubaka, “Na kilumbu ya nana mwana kwendaka na lukolo.” Yandi tubaka, “Mu me landa yandi bamvula zole,” na ntwala ya mafunda kumi ya bantu. Kuna kaka yina. . . Ya kele na foto ya yawu, na lukutakanu ya Seattle, na kati—na kati ya buku ya beno. Yandi tubaka, “Mu zola beno nyonso kuzaba ti beno ke na kuwa mwa musambi mosi ya luvunu ve. Beno ke na kuwa Kieleka.” Capitaine Al Farrar. Mpe kilumbu yina vwandaka landa mu twadisaka yandi na Nzambi, mpe yandi kuzwaka mbotika ya Mpeve-Santu, na kisika ya kukubula, na yisi ya kisika ya nene kuna.

Mu tubaka, “Ya lenda vwanda ti muntu yayi ke sala mutindu mosi.”

Na yawu yandi tubaka, “Nge kele na boma na kukwenda kuna?”

¹³⁷ Mu tubaka, “Na boma? Samu na yinki, kieleka ve. Kieleka ve. Samu na yinki mu ke vwanda na boma na yina Nzambi me fidisa munu na kusala yawu? Yandi kele Muntu yina ke nwanaka mvida, munu ve.” Na yawu mu tubaka, “Ntangu yayi, mu zola ti beno nyonso kuvwanda na lweka.” Mpe na yawu. . .

¹³⁸ Beto kwendaka na lukutakanu na nkokila yango, kisika vwandaka ya kufuluka. Mpe mukengi ya kisika kuna me kwiza, yandi me tuba, “Révérend Branham, mu me baka na kosalu bana kumi ya Mexique.” Yandi tubaka, “Tala awa, ‘Ba ke lakisa révérend Branham na nkokila yayi na FBI, musambidi ya fanatike,’” to kima yankaka mutindu yina. Mpe tubaka, “Ya kele na zulu ya matoma ya bawu nyonso. Ke katula. . .” Yandi tubaka, “Mu me baka na kosalu bana kumi ya Mexique, ba ke katula yawu nyonso mpe ke tula yawu awa.” Yandi tubaka, “Oh, mu ke na nsatu ya kubyeta muntu yina!”

¹³⁹ Mu tubaka, “Kutala mpasi ve, tata. Nzambi ke simba yandi, beno me mona.” Mu tubaka, “Beno bika kaka yandi.”

¹⁴⁰ Na yawu yandi kwizaka kuna. Mpe na nkokila yina ntangu beto kumaka, mu lendaka zimbanu yawu ve, mu me kwenda na kati ya kivinga. Mu. . . Mpangi Baxter kuyimbaka *Kwikila Kaka*. Yandi tubaka, “Ntangu yayi, Mpangi Branham me tuba na nkokila yayi ti beto bika yinzo yayi.” Yandi tubaka, “Mu ke kwenda na manima kuna mpe mu ke vwanda.” Yandi tubaka, “Ba ke na kukubibama samu na kulakisa yandi na nkokila yayi awa na zulu ya plate-forme.” Yandi tubaka, “Mu me monaka yandi na kati ya bamvita mingi ya ngolo, mpe kumona Nzambi

kubaka kisika ya yandi.” Yandi tubaka, “Mu—mu ke kwenda kaka vwanda na manima.”

¹⁴¹ Mu me belama. Mu tubaka, “Mu vwanda tanga kaka mwa mukanda awa kisika ti ba ke lakisa munu na nkokila yayi na estrade awa.” Mu tubaka, “Mu zola bisadi ya FBI ntangu yayi kukwiza na ntwala mpe kulakisa munu awa na zulu ya estrade.” Mu tubaka, “Mu kele ya kutelama awa samu na kunwanila Nsangu ya mbote; mu zola ti beno kwiza mpe ti beno kulakisa munu.” Mu kuingilaka. Mu tubaka, “Ya lenda vwanda ti ba kele ntete awa ve.” Mu zabaka kisika mu vwandaka. Yandi lakisaka munu yimeni na kati ya kivinga ya munu kuna, yinki zolaka salama, ntete mu basika, beno me mona. Mpe mu tubaka, mu tubaka, “Mu banza kuingila kaka mwa fyoti. Beto lenda yimba mwa nkunga?” Mpe muntu kwizaka mpe yimbaka solo mosi.

¹⁴² Mu tubaka, “Tata kisadi ya FBI, nge kele na kati to na ngaanda? Mu ke na kuingila ti ba kulakisa munu. Nge zola kukwiza na mantwala?” Muntu ve kwizaka. Mu landaka na kuyindula kisika ya vwandaka. Mfumu tubaka na munu yinki ya vwandaka. Ya vwandaka milongi zole yina vutukaka manima, mpe mu—mu vwandaka tala mbote. Mu monaka kinsinsya ya ndombi ya kulelika na nsongi. Mu zabaka kisika ya vwandaka. Mu talaka na lweka kuna, mpe yawu me kwenda mbala mosi na zulu mpe me kwenda na zulu na balko mutindu yayi. Bakala mosi na mwatu ya bleu, yankaka na ya gris.

¹⁴³ Mu tubaka, “Bankundi, ya kele FBI ve. Yinki FBI ke sala na kulonga Biblia?” Mu tubaka, “Kieleka ve. Ba vwandaka ve bisadi zole ya FBI samu na kulakisa munu. Kasi, awa kele yina kele ya kulakisa, ba kele ya kuvwanda na zulu kuna, milongi zole yina kuna.” Mpe bawu me fukama. Mu tubaka, “Beni kufukama ve mutindu yina.” Mpe zole ya bantu ya Texas ya nene zolaka kwenda na zulu kuna mpe kunyefa bawu. Mu tubaka, “Ve, bankundi, yayi kele ve dyambu ya nzutu mpe menga, beno vwanda kaka swi. Nzambi ke tala yawu.”

¹⁴⁴ Mu tubaka, “Ntangu yayi, bankundi, beno tala, na yina beno kele na zulu kuna, beno tala lweka yayi.” Mu tubaka, “Kana . . . Beni tubaka ti mu vwandaka Simon ya nganga-nkisi, ti mu vwandaka sala kindoki, ti mu vwandaka loka bantu.” Mu tubaka, “Kana mu kele Simon ya nganga-nkisi, na yina beno kele muntu ya Nzambi. Ntangu yayi beno kulumuka mpe kwiza na zulu ya estrade yayi. Mpe kana mu kele Simon ya nganga-nkisi, ti Nzambi bula munu mu kufwa. Mpe kana mu kele profete ya Nzambi, beno kulumuka mpe ti Nzambi bula beno beno kufwa. Ntangu yayi beto ke mona nani kele kieleka mpe luvunu. Ntangu yayi beno kulumuka. Beto ke yimba nkunga.” Ba basikaka na yinzo, mpe beto monaka dyaka bawu ve katuka yina. Beni me mona? Mu tubaka, “Beni kwiza. Kana mu kele Simon ya nganga-nkisi, ti Nzambi bula munu mu kufwa. Mpe kana mu kele profete ya Nzambi, kuna Nzambi ke bula beno beno ke kufwa na yina

beno ke kwiza na estrade yayi. Kana mu kele kieleka na ntwala ya Nzambi, Nzambi ke bika beno kufwa na zulu ya estrade yayi.” Ba zabaka mbote. Ya kele kieleka. Ba zabaka mbote. Ba kuwaka yina salamaka na bisika yankaka. Ya kele kieleka. Na yawu beno banza ve ti Nzambi kele dyaka ve Nzambi. Yandi ke pesaka bamvutu.

¹⁴⁵ Ntangu yayi, ndoki ya kento ya En-dor yayi, yandi matisaka mpeve ya Samuel. Mpe Saül zonzaka na Samuel. Ntangu yayi, beno lendaka kumiyufula wapi mutindu ya lendaka salama. Ya lenda ve kusalama bubu yayi. Ve, tata. Samu ti, menga ya bangombe ya babakala mpe ya bankombo ya babakala vwandaka kaka samu na kuvingila ntangu ya kulunga. Ntangu muntu vwanda kufwa na bilumbu yina . . . Milongi, beno pesa munu ngolo kana beno banza ti Ya kele kieleka. Ntangu muntu vwanda kufwa, yandi vwanda kufwa na yisi ya kukatula-masumu ya niama, mpe mwela ya yandi vwandaka kwenda na Paladiso. Mpe yandi vwandaka vwanda kuna tii, tii—tii Kilumbu ya Mpulusu. Mpe moyo ya yandi vwandaka na kati kuna.

¹⁴⁶ Bika mu fikula beno mwa kizizi awa. Bantu yikwa tangaka mukanda ya munu, to mukanda yina ba sonikaka na zulu ya munu na *Reader's Digest* awa, na kutala na numelo ya Ngonda ya kumi, to ya Ngonda ya kumi na mosi? Mbote mingi. Beno talaka mutindu ya vwandaka? Beno talaka, na kutala basabala zole to tatu na ntwala ya yina, medium ya nene ya kuzabana yayi awa yina ba ke tulaka na kuteza katuka bantangu mingi me luta, yandi, Mademoiselle Piper. Ya ke na muntu me tanga ntete yawu, mukanda samu na Mademoiselle Piper na *Reader's Digest*? Ya kele ngitungu mutindu bampeve nyonso zole . . .

¹⁴⁷ Bangunga yikwa me bikana na munu? Ve kasi kaka fyoti. Mu ke na makumi zole na manima, mu fwana sala kaka mbangu. Mu zaba ti beno kele . . . Beno tala, beno lemvočila munu fyoti.

¹⁴⁸ Beno zaba, ya kele—ya kele na ya luvunu. Ya kele na ya kieleka mpe na ya luvunu na bima nyonso. Kana mu pesa beno dollar, mpe ti mu tuba, “Yayi kele dollar ya mbote?” Mpe beno ke tala yawu, ya fwana kieleka talana mingi mutindu dollar ya kieleka to beno ke kwikila yawu ve. Ya kele kieleka? Na yawu ya fwana kuvwanda kulanda mosi ya kieleka ya mbote.

¹⁴⁹ Mpe kana Yesu tubaka ti bampeve nyonso zole na bilumbu ya nsuka ke vwanda ya kubelama mingi tii ya ke vuna yina Soolamaka ya kieleka kana ya lendaka salama, misambidi. Ntangu yayi beno bambuka moyo. Ntangu yayi, ya kele na kima ve kuna na kati ya madi- . . . ya mi- . . . madidi, ya misiku. Na ngaanda ba kele kaka na kifwani ya kinzambi, beno me mona. Kasi bampeve zole yayi, bampeve ya kieleka, ke vwanda ya kubelama mingi tii ya ke vuna yina Soolamaka ya kieleka, mutindu ba vwandaka sala lweka na lweka na bilumbu ya nsuka. Yesu tubaka yawu? Yandi tubaka yawu.

¹⁵⁰ Ntangu yayi beno tala mbote, bankundi, mu ke fikula beno mwa kizizi. Mu zola beno kutala awa mwa minuti kaka. Mpe ti beno pesa munu dibanza ya beno nyonso, samu ti mu ke pesa beno kingana, mpe kuna beno ke mona yawu.

¹⁵¹ Ntangu yayi, na *Reader's Digest*, ba sonikaka kuna, ti mu vwandaka ya kutelama na ngaanda kuna, ti beto vwandaka na mafunda makumi zole na sambwadi ya bantu yina vwanda vingila samu ba sambila bawu, ya kutelama kuna. Beno tangaka mukanda. Mpe muntu mosi katukaka na Canada, mpe yandi vwandaka na mwa mwana ya bakala yina vwandaka na Mayo mpe Johns Hopkins, kimbevo ya ngolo ya ditonzo yina kufikisaka mwa maboko ya yandi mutindu *yayi*, mpe kufikisaka makulu ya yandi na yisi ya yawu. Mpe ba tubaka, “Ya kele na ata kupasula to kima ba lenda sala.”

¹⁵² Na yawu yandi vutulaka yandi na Canada. Yandi tubaka, “Ba me nunga munu ntete ve.” Beno kuzwa numelo ya Ngonda ya kumi na mosi ya *Reader's Digest*, mpe ba me bokila yawu *Kimangu ya Donny Morton*. Mpe—mpe kuna ba me tuba ti, na kati kuna, ti—ti muntu yina tubaka, “Mu kele ya kununga ntete ve, samu ti mu zaba muntu ke belusaka na lukwikilu ya nkumbu William Branham, yina salaka bankundi ya munu zole yina vwanda ya kufwa makutu mpe yina vwandaka dibaba kuzonza mpe kuwa.”

¹⁵³ Mpe ba bokilaka samu na kusosa kuzaba kisika mu vwandaka, kana dyaka na—na Amerika. Mpe mu vwandaka na Costa Mesa, na Californie. Mpe ya kele mukanda, ntangu beno ke tanga yawu, beno yilama na kudila. Ya ke pasula kaka ntima ya beno. Mutindu yandi lutilaka na bikunku ya mvula ya mpembe, mpe bima nyonso yankaka, na bébé! Yandi vwandaka tuba, “Sala keba, Donny.” Yandi vwandaka tuba, “Ntangu yayi, beto kele ya kununga ve.” Mpe mwa mwana ya bakala vwanda lenda kuseka, na mpasi, yandi vwandaka tala mingi mpasi. Yandi vwandaka tuba, “Beto kele ya kununga ve, beto ke lomba Nzambi. Beto ke kwenda na profete ya Nzambi mpe ke yufula yandi.”

¹⁵⁴ Na yawu kuna ba lutilaka na mvula ya mpembe. Mpe na nsuka ba kumaka kuna, mpe mama zolaka kwiza na bawu, mpe ba vwandaka ve na mbongo mingi samu na kubaka mpepo, na yawu ba vutulaka mama. Mpe mwana ya bakala na papa kwizaka na tomabilu, mpe mutindu ba zyetaka nzila nyonso katuka Winnipeg, na Canada, tii Costa Mesa, na Californie. Mpe ba kumaka kuna, mbongo me manisa, mpe tata tubaka mutindu yandi zolaka soba yandi ba-couche, mwa mwana ya bakala ya bamvula sambwadi to nana, kieleka ya kulemba kaka. Mpe mutindu yandi zolaka . . . vwanda lenda ve na kudya ata kima, mpe yandi tubaka ti mwa mwana ya yandi ya bakala lendaka kaka kuwa yandi kuzonza. Mpe yandi tubaka ti mutindu meso ya yandi vwandaka tala, ti yandi vwanda—yandi vwanda meka

na kuseka, beno zaba. Mpe kuzaba ti yandi. . . Yandi vwandaka tuba na yandi bima yankaka yina yandi vwandaka mona, kuna na Amerique.

¹⁵⁵ Mpe ntangu ba kumaka kuna, na Californie, ba tubaka na kisadisi ya nzyetolo, nani yandi kwizaka mona. Yandi tubaka, “Me kwiza mona muntu ya Nzambi yinki?” Mpe na kidimbu ya kyuvu ya nene.

¹⁵⁶ Kieleka, beno lenda banza yina Amerika tubaka samu na yawu, beno me mona. Beno me mona, yina kele beto, beno me mona, “Beto kele na mayela mingi! Beto zaba nyonso, beno zaba, mpe ya kele ve na nsatu ya kutuba na beto kima. Beto kele na yawu nyonso ya kusonama.” Beno me mona?

¹⁵⁷ Na yawu kuna, na yawu, “Muntu ya Nzambi yinki? Beno me zyeta nzila nyonso katuka Winnipeg, na Canada?” Beto tala, ba banza ti ya vwandaka kima ya boma.

¹⁵⁸ Na mutindu nyonso, zulunale me kubika ditoma mpe me fidisa yandi kuna. Mpe yandi tubaka, ntangu ba kumaka na ndonga, kisika ya vwandaka, yandi tubaka ti mafunda makumi zole na sambwadi ya bantu vwanza vingila bisambu. Kasi yandi tubaka, ntangu ba monaka mwana ya bakala ya fyoti yina, ya mutindu yankaka, mpe papa ya mawa yina na bonnet na zulu ya yintu, kazaka ya yandi ya kupasuka, yandi tubaka ti bantu nyonso vwandaka kwenda na lweka mpe pesaka yandi kisika ya yandi. Ntangu yandi kumaka na estrade. . .

¹⁵⁹ Ya kele ya kuswaswana na misiku na kusobisa kalati ya bisambu. Muntu fwana kwiza na lukutakanu mpe kuvwanda na kalati ya yandi mosi. Kana ba simba beno na mulonga, ke na kusobisaka bakalati ya bisambu na muntu yankaka, kate ya bisambu yina ke ndimama dyaka ve. Beno me mona? Samu ti beno fwana kwiza kuwa malongi mpe kuzaba mutindu ya kuzwa yawu. Ya me tala beno. Beno lenda ve kwiza kuzwa yawu samu na muntu yankaka. Beno fwana kwiza kuzwa yawu beno mosi, samu beno kuwa. Muntu mosi ya nene tubaka, “Kana. . . Mbote, mu ke kwikilaka mingi ve na kima yayi. Kasi, mu banza kana Yandi ke belusa munu, munu. . .” Beno me mona? Mpe kuna yina ke nataka mambu na estrade, na yawu ba ke sukisaka kaka dyambu ntete yawu kusalama kuna.

¹⁶⁰ Na yawu ntangu mwana ya bakala kubelamaka, to tata kubelamaka na estrade, na ntwala ya bantu, Billy me yufula yandi kalati ya yandi ya bisambu. Yandi vwandaka na yawu ve. Yandi tubaka, “Na yina lemvokila munu, tata.” Yandi tubaka, “Nge fwana vingila.”

¹⁶¹ Yandi tubaka, “Mbote.” Yandi tubaka, “Mu ke vingila.” Yandi tubaka, “Mu ke vingila kaka ntangu ya munu mutindu bayankaka, kuna.” Yandi tubaka, “Mu vwanza zaba ve ti mu zolaka sala yayi.”

162 Mpe kuna mu vwanda zonza na muntu, mu me kuma ke na kuwaka. Mu me mona tata yina kuvutuka, mpe mu me tuba, “Dyambu vwandaka yinki?”

Yandi me tuba, “Yandi vwandaka ve na kalati ya bisambu.”

Mpe Kima me tuba na munu, “Vutula yandi.”

163 Na yawu mu tubaka, “Beno nata yandi awa.” Mpe tata kwizaka, mpe masangasa vwanda kubwa na kizizi ya yandi, mandefo yina vwanda sosa ti ba zenga yawu. Mpe yandi—yandi me belama, mpe yawu yayi yina tubaka *Reader's Digest*. Beno me mona? Mu yufulaka ata kyuvu ve, kasi talaka kaka mbala mosi kizizi ya mwana, tubaka na mwana kisika yandi katukaka, ti yandi vwandaka na Dispensaire ya Mayo, mpe nyonso yina vwandaka dyambu ya yandi, mutindu yandi vwandaka bela, mpe nyonso.

164 Mpe na yawu tata bandaka na kudila, mpe yandi vwanda banda na kukwenda. Mpe ba tubaka ti na yina yandi vwanda banda kukulumuka na estrade, mpe ti yandi balukaka, yandi tubaka, “Ya kele kieleka, tata.” Yandi tubaka, “Kasi bébé ya munu ke zinga ve?”

165 Mu tubaka, “Yina mu lenda tuba ve.” Mu tubaka, “Vingila fyoti.” Mu monaka vision. Mu tubaka, “Beno ke zola kukwikila yayi ve, samu ti Mayo na Hopkins bawu zole tubaka ti ba lenda sala kupasula na yintu yina ve, kasi mu ke tuba na nge yinki ya kusala. Beno, mbasi, beno vutuka kaka na mwana yayi. Na kati ya bilumbu tatu nge ke kutana na kento mosi ya bansuki ya ndombi na bala-bala, mpe kento yango ke yufula nge yinki kele dyambu na mwana yayi. Mpe kuna yandi ke tubila nge na mwa dokotolo mosi ya yinsi awa yina lenda sala kupasula yango, mpe nge ke na nsatu ya kukwikila yawu ve, samu ti Mayo bikaka yawu mpe tubaka, ‘Ba lenda sala yawu ve.’ Kasi yayi kele kaka bweso yina mwana ya beno me kuzwa, na nzila ya ngolo ya Nzambi, kyadi ya Nzambi mpe kupasula yango. Ntangu yayi, kana nge ke kwikila munu na kuvwanda profete ya Yandi, kwenda sala mutindu mu me tuba na nge.” Ya kele mutindu kutula bafike na zulu ya Ézéchias, mpe nyonso yina.

Yandi tubaka, yandi balukaka mpe tubaka, “Matondo.” Yandi me kwenda.

166 Bilumbu zole to mingi lutaka, mpe yandi vwandaka na bala-bala kilumbu mosi, mpe mama mosi me kwiza, yandi tubaka, “Yinki diambu na bébé ya beno?”

167 Yandi tubaka, “Ya kele kimbevo ya yintu.” Mpe yandi vwandaka landila na kuzonza mutindu yina. Mpe, mbote, ba—ba vwanda banza ti ya vwandaka yimbi mingi, beno zaba.

168 Na yawu yandi tubaka ti kaka na mwa baminuti kima kusalamaka. Yandi tubaka, “Tata, mu zaba muntu yina lenda sala kupasula yina.”

169 Yandi tubaka, “Mama, tala, Bampangi ya Mayo kubikaka yawu mpe tubaka ti ya lenda salama ve.” Yandi tubaka, “Muntu mosi awa ya nkumbu ya Mpangi Branham, kusambilaka samu na yandi.” Yandi tubaka, “Yandi salaka kisambu samu na mwana.” Yandi tubaka, “Vingila fyoti! Bansuki ya ndombi, ya kulwata complet ya gris.” Yandi tubaka, “Ya kele kento yango.” Yandi tubaka, “Wapi kisika kele dokotolo yango?” Mpe yandi tubaka na yandi. Yandi nataka yandi kuna mpe dokotolo salaka kupasula, mwana kumaka mbote.

170 Ntangu yayi, yina kuzabanaka na nzila ya *Reader's Digest*, beno me mona. Mpe Bampangi ya Mayo kubokilaka munu samu na kuyufula samu na yawu. Ba tubaka, “Révérénd Branham, yinki nge salaka na bébé yango?”

171 Mu tubaka, “Kima ve. Mu simbaka yandi ata fyoti ve. Mu tubaka kaka yina Nzambi tubaka na munu na kutuba na yandi. Muntu yina tumamaka na yawu.”

172 Ntangu yayi, dyambu ya kuseka na yawu, kele na kutala basabala zole na manima ya yina, to basabala zole na ntwala ya yina, to tatu, na *Reader's Digest*, mu banza ngonda na ntwala, mukanda na zulu ya Ma Piper kubasikaka. Ntangu yayi, yandi kele ndoki ya kento ya kieleka, to medium. Ntangu yayi, ya kele na mosi kele kieleka, mpe ya kele na muntu yina ke na kulanda. Ba kuzwaka kento yina kubanda 1897. Yandi me luta bamvula nkama ntangu yayi, na New York, bawu zole... ya kufwa makutu mutindu mbungu. *Reader's Digest*, beno kuzwa... Mu banza ti ya basikaka na kutala bangonda zole to ngonda na ntwala ya munu; mpe beno lenda tala yawu, na ntonono ya automne. Tata Baxter vwandaka na yawu kilumbu yankaka yina. Kana mu banzaka na yawu, mu zolaka lomba yandi... to kana mu zabaka ti mu zolaka tuba yayi, mu—mu zolaka nata yawu na munu. Mu lenda kuzwa yawu samu na beno. Mpe ya kele na ba—page kumi na zole to kumi na yiya. Yandi vwandaka kaka kento ya yinzo ya ntangu nyonso. Mpe yandi kotaka na transe kilumbu mosi, na yina yandi vwandaka bela, mpe yandi bandaka na kuzonza na mafwa. Mpe ba nataka kento yango bisika nyonso na yinza, bisika nyonso. Ba nataka yandi na Angleterre. Ba salaka yandi kusoba bilele, bambala mingi, mpe monaka kana ya vwandaka na mambu mpe bima, mpe na kukumaka kuna mpe ba sobisaka muntu na kibukutu na kizizi, muntu ya Grec, mpe yandi fwanikisaka mutindu ti yandi vwandaka muntu ya Angleterre. Mpe yandi tubaka na yandi nyonso ya yandi. Mpe yandi—yandi—yandi vwanza sosa kubokila mosi ya bampangi ya yandi yina kufwaka.

173 Ntangu yayi, kima kaka yina yandi... Bisika nyonso na yinza, mpe yawu yayi yina *Reader's Digest* tubaka kuna, awa bampimpa fyoti me luta, to bangonda fyoti me luta, mosi ya bima ya bawu kulakisamaka. Muntu mosi na kutala pesaka kifibu na diboko ya mama ya yandi ya mukuyu, mpe kilumbu

yina vwandaka landa ba lakisaka na yinzo ya lufundusu ya bapulusu ti yandi pesaka kaka kifibu na kitini ya mousseline ya fromage. Bantu mingi ke landa-landaka medium! Ba kele kaka mwa mitangi ya ntama yina ke vwandaka na ngaanda na lweka ya bala-bala, bayina kele ba-medium ve na kubanda. Ba kele kima ve kasi bantu ya luvunu ya bamekudi. Kasi ya kele na medium ya kieleka.

¹⁷⁴ Mpe beto misambidi, beto kele na bantu mingi ya bamekudi balweka nyonso zole. Ntangu yayi beno vwanda swi baminuti fyoti.

¹⁷⁵ Ntangu yayi beno tala, Mademoiselle Piper kele medium ya kieleka. Mpe magazine tubaka, “Yawu yayi kima yina beto lenda tudila ntima, ti, ntangu muntu ke kufwaka, yandi kele ve ya kufwa. Yandi ke zinga kisika mosi, samu ti kento yina vwanda bokila bampeve ya bawu na kuvutuka mpe vwanda zonza na bantu.”

¹⁷⁶ “Ntangu yayi, yinki yandi vwanda sala, Mpangi Branham? Nge ke kwikila na yawu?” Yinga, tata. Biblia ke tuba yawu, ya kele samu na yina mu ke kwikila na yawu. Mpe yandi kele ya dyabulu. Kuzonza na bampeve ya mafwa kele mayela ya dyabulu. Ntangu yayi beno tala, ntangu yayi beno tala bawu nyonso zole mbote.

¹⁷⁷ Mpe kuna ya lungaka ti beno mona lutangu ya mikanda kukwiza na munu, na manima, ntangu mukanda ya munu kulwandaka ya yandi. Ya kele ngitukulu ve ti, kaka ntete nsuka ya ntangu, Nzambi me zonzila na bima yayi? Mpe *Reader's Digest* ke samunaka na bandinga nyonso yina kele na yisi ya mazulu. Beno me mona? Beno tala, ya kele ngitukulu ve ti ba landakanaka mosi na yankaka?

¹⁷⁸ Ntangu yayi kuna kwizaka mikanda, vwanda tuba, “Mpangi Branham, yina ke lakisa ti nge kele kima ve kasi medium.” Ya vwanda tuba, “Yina ke lakisa yawu. Tala awa, nge tubaka na kento yina kisika yandi ke kwenda tala. . . Tala kento *yayi?*”

¹⁷⁹ Mu tubaka, “Vingila fyoti.” Mu kele na mukanda ya lutumu awa, (beno lemvokila munu), samu na kufidisa na bantu. Mu tubaka, “Mutindu beno zaba fyoti milongi.” Mu tubaka, “Na kisika ya kubotika nzutu ya beno, beno ke na nsatu ya mbotika ya matonzo.” Ya kele kieleka. “Beno ke sikamaka ve na kubanza na bima. Beno ke mekaka ve na kutala yawu mbote.”

¹⁸⁰ Ya kele mutindu mosi ba salaka na bilumbu yankaka. Ba monaka Yesu. Ba zabaka ti Yandi lendaka. . . Yandi zabaka mansweki ya ntima ya bawu. Yandi zabaka samu na yinki ba vwandaka sala mutindu yina. Mpe ba tubaka, “Yandi kele mfumu ya bampeve ya yimbi. Yandi kele Béelzébul, mbikudi ya mbote na yinza.” Ba sukaka ve na kusosa kuzaba, na kumona ti ya vwandaka Mwana ya Nzambi. Ba vwandaka ya kimpeve mingi ve samu na kuzaba yawu. Kaka yina, ba ke luta na zulu ya

kima yango ntangu ba ke tangaka. Kieleka, Yesu zolaka kwiza na Jérusalem, na zulu ya mpunda, mpe nyonso yina, kasi ba vwanda tala na Kwizulu ya zole.

¹⁸¹ Mpe kima mutindu mosi bubu yayi! Ba ke na kususaka na zulu ya kima ya kieleka. Alleluia! Ya kele kieleka. Mu zaba ti Nzambi kele awa, na manima ya midi yayi, mpe mu zaba ti mu ke na kubaka ntangu mingi ya beno, kasi beno fwana mona yayi, nkundi. Kana mu lenda mona beno dyaka ve, beno fwana zaba yinki bampeve ya yimbi kele, beno fwana zaba yinki kele Kieleka mpe luvunu. Mpe ya kele ya kubelama mingi, beno fwana sala luswaswanu.

¹⁸² Ntangu yayi beno bambuka moyo, ya ke vwanda ve na ngaanda kuna, kima na lweka *yayi* mutindu ba-Pharisien, to kima mosi ya ntama na lweka *yina*. Ya kele kaka awa na mwelo, kieleka ya kubelama. Beno tala yawu mbote. Ntangu yayi kana mu baka. . .

¹⁸³ Ti beto baka bima zole yayi. Kana mu baka mpe mu pesa beno dollar, ntangu yayi, kana mu pesa beno dollar ya luvunu. Beto ke baka kingana samu beno mona yawu. Kima ya ntete yina beno ke sala, kana beno kele muntu ya mayela, kana beno baka dollar mpe ti beno tala yawu, kima ya ntete, beno ke simba yawu na malembe mpe kumona na yinki ya kele ya kusala. Ya kele kieleka? Beno ke tala na yinki ya kele ya kusala. Beno ke tala na ntalu ya yawu. Dollar ya kieleka kele ya kusala na mukanda ya mpamba ve, ya kele ndambu na mukanda mpe soie, beno me mona. Mpe kima ya ntete, beno fwana tala na ntalu ya yawu. Yina kele kidimbu ya ntete.

¹⁸⁴ Mpe ntangu yayi bika beto nata yawu na lweka *yayi*; mpe beto nata Mfumu na lweka *yayi*, yina ke sala na beto.

¹⁸⁵ Ntangu yayi beno tala, kima ya ntete beno fwana tala, nyonso. . . Beno tala mbote mukanda ya beno. Na kati ya bamvula makumi tanu na ndambu na kutubaka bambikululu ya yandi, mpe kubokila bampeve ya mafwa, yandi me tangunaka mbala mosi ve Nzambi, Klisto, Kubeluka ya Kinzambi, mpulusu, Lusambusu, to kima ve. Ya kele kima ve kasi nsaka mpe bulawu na kati ya yawu.

¹⁸⁶ Kasi na lweka *yayi*, ya kele ntangu nyonso Nzambi, Lusambusu, Kwizulu ya Yesu, kubeluka ya Kinzambi, ngolo ya Nzambi, mpulusu. Beno tala luvalu ya yawu. Beno ke monaka ve bambikudi mpe bandoki ya bakento kulonga Nsangu ya mbote. Yinki kele dyambu na bantu? Oh, la la! Beno tala!

¹⁸⁷ Mpe kima ya kieleka ya kusala, kana beno zola kuzaba kana ya kele dollar ya kieleka to ve, kana ya kele mingi mutindu mosi, beno baka banumelo ya yawu mpe beno fidisa yawu na yinzo ya mbongo. Mpe kana ya kele na banumelo kuna yina ke fwanana na yawu, ya kele na dollar ya kisengo ke na kuingila yawu. Ya kele kieleka?

188 Mbote, na yina, mpangi, beno baka yina yandi salaka mpe beno nata yawu na Biblia, beno ke tala ti yandi kele ndoki ya kento ya En-dor.

189 Mpe beno baka yina kele awa, beno ke tala yawu, ti ya kele na Buku awa na yinzo ya Mbongo, “Yesu Klisto mutindu mosi mazono, bubu yayi, mpe kukondwa nsuka.” Ya kieleka, kisalu ya Yandi ya mutindu mosi! Yandi kwendaka landa ve bulawu mpe mambu ya buzoba na bantu. Ya vwandaka samu na mbote, samu na kusadisa muntu, samu na kutwadisa bawu na Nzambi. Amen! Mu ke na kutuba ve “amen” samu na munu mosi, kasi *amen* zola tuba “ti ya vwanda mutindu yina.” Mpe mu . . . Mu ke kwikila Yawu. Mu zaba ti Ya kele Kieleka.

190 Ntangu yayi, beno bawu yayi. Ntangu yayi, na nswalu ntangu yayi, samu ti mu zola kubumba beno ntama mingi ve.

191 Awa, bika beto pesa mwa kifikulu awa, mwa kifikulu na dibanza. Awa kele na mwila yina ke lutaka awa, yina ke lutaka na yisi na lweka *yayi*, yina ke lutaka na luzingu. Ntangu yayi beno tala mbote. Ya kele nzila. Beno pesa munu dibanza ya beno nyonso ntangu yayi, samu beno kondwa yayi ve. Ke luta mutindu *yayi*. Ntangu yayi, na mwa nzila yayi awa ke zinga bantu yina ke kufwa, beno na munu. Ntangu yayi, na kati kuna, beto tala yinki ya kele. Ya kele ya kifuluka na bima ya bulawu mpe bima nyonso yankaka, kasi kaka na ntangu fyoti beno ke mona nsemo. Beno ke mona bampimpa mpe babala-bala, yina kele kusakana mpe kilengi, bampeve ya yimbi ke na kuzwa bantu. Oh, ba ke lwataka mbote, oh, mpe ya luzabu mingi mutindu ba lendaka vwanda, ya mayela ya kitoko, kasi dyaka dyabulu. Kasi ya kele na bayina kele ya kubutuka mbala ya zole yina kele ya kuvwanda na kati kuna.

192 Ntangu yayi, bantu zole yayi na kati ya nzila yayi kele na yisi ya lutumu ya balweka nyonso zole. Ntangu yayi, na lweka yayi na kukwendaka nzila *yayi*, ya kele na butatu. Mpe na lweka yayi na kukwendaka nzila *yayi*, ya kele na butatu.

193 Ntangu yayi, na yina, ntangu yayi na kisika ya ntete, na lweka *yayi*, kele na mioyo ya *bantu ya yimbi*, ntangu muntu ke kufwaka yandi ke kwendaka na kisika ya kuingila lusambusu. Yesu kwendaka mpe longaka na myela yina vwandaka na kati ya boloko kuna. Yina ke landa kele bampeve ya yimbi. Yina ke landa, kele dyabulu na difelo. Na kumataka, na ntete, ntangu yayi, bayina na kati kuna kele mikuyu, bampeve ya bantu ya kufwa yina vilukaka ata fyoti ve. Ba ke na kuingilaka Lusambusu. Kima kaka yina bawu zaba kele bulawu mpe yina ba salaka.

194 Ntangu yayi, na zulu awa, Baklisto yayi kele na yisi ya lutumu ya Zulu. Yayi kele kingana. Na zulu awa kele Mpeve yankaka, Mpeve-Santu, Mpeve ya Muntu, Klisto Yesu. Mpeve-

Santu, Mpeve-Santu ke pesa lutumu na Dibuundu ya Yandi na kitezo ya bantu ke kufwa yayi.

¹⁹⁵ Dyabulu, na nzila ya bampeve *yayi*, ke pesaka lutumu na bantu. Ntangu yayi, beno tala, yina ke landa ke Bawanzio. Yina ke landa ke Nzambi. Ntangu yayi, konso bantu yina ke kufwa awa kele na yisi ya lutumu ya mosi ya bayinza yayi. Beno me mona yina mu zola tuba?

¹⁹⁶ Ntangu yayi yina kento yina salaka, yandi vwanda kota na kitezo yango. Mpe yandi ke zonza na bantu yina vwandaka ya kuyala na bampeve ya yimbi yina vwandaka, na mbandukulu, bampeve ya bawanzio yina kubwaka bayina vilukaka ve kuna na mbandukulu, mpe pesaka muswa ti myoyo ya bawu kuvwanda ya kuyala na bawu. Mpe ba ke na kuvingila Lusambusu.

¹⁹⁷ Mpe *bayayi* na zulu awa kele na yisi ya lutumu mpe kele ya kubutama ya mona na nzila ya Mpeve ya Nzambi. Mpe dyabulu kele na bapofete ya yandi, mpe Nzambi kele na baya Yandi. Beno me mona yina mu zola tuba? Ya kele lutumu, mpe kuna beto ke kwenda. Beno sikama samu na kusala luswaswanu ya yawu. Yesu, ntangu Yandi vwandaka awa na zulu ya ntoto . . .

¹⁹⁸ Ntangu yayi, bubu yayi, yandi lenda ve kukota na kitezo yina mpe kubasisa muntu ya kusungama ya kitezo yina. Yandi ke lenda ve na kusala yawu, samu ti bantu ya kusungama kele kuna ve kisika ba vwanda vwandaka, na Paladiso. Ve, tata. Paladiso kusukaka, ntangu Menga ya Yesu kukatulaka yawu. Beno tala awa. Oh!

¹⁹⁹ Kana mu lendaka banza na mutindu yina Yesu, ntangu Yandi kufwaka, Yandi kwendaka mpe longaka na myela yina vwandaka na boloko. Yandi kufwaka, nsumuki, zabaka ata disumu ve, kasi disumu ya beto vwandaka na zulu ya Yandi. Mpe Nzambi, samu na masumu ya Yandi, fidisaka Yandi na difelo. Biblia ke tuba, “Yandi kwendaka mpe longaka na myela.”

²⁰⁰ Bantu ke tubaka, “Mpangi Branham, mu ke na kubakula yawu ve.” Ba ke tuba, “Yesu vumbukaka na kilumbu ya tatu. Yandi kufwaka Kilumbu ya tanu na manima ya midi mpe vumbukaka na lufwa Lumingu na suka, kasi, Yandi vwandaka ya kufwa kilumbu kaka mosi.”

²⁰¹ Yandi tubaka, “Na ntangu kaka yina,” samu ti Yandi vwandaka na Masonuku mosi na Biblia, yina Yandi zolaka telama. Samu ti, David, muntu yina vutukaka manima na ntwala, kasi yandi vwandaka ya kuvuuka, kasi profete na yisi ya kimpeve ya Nzambi, tubaka, “Mu ke bika ve moyo ya Yandi na difelo, to dyaka kubika Muntu ya Munu ya Santu kumona kubola.” Mpe yandi zabaka, bilumbu tatu mpe bampimpa tatu, ti nzutu yina ke banda na kubola. Mpe Nzambi salaka profete kutuba, “Yandi ke mona kubola ve.” . . . ? . . . [Kisika ya mpamba na bande—Mu.]

Alleluia! Yandi bakaka Ndinga ya Nzambi. Yandi nungaka Satana, konso ntangu, na Yawu. Yandi nungaka lufwa, na Ndinga ya Nzambi. Alleluia! Yandi nungaka lufwa. Mpe ntangu ba kufwaka Yandi, mpe Yandi kufwaka, musumuki, masumu ya munu mpe masumu ya beno na zulu ya Yandi, Yandi kulumukaka, mu lenda mona Yandi kukokota na moyo yina kuna.

Mpe myelo ya bayina vwandaka ya kuzimbana me kwiza mpe me tuba, “Mbote, Nge kele Nani?”

²⁰² Yandi tubaka, “Samu na yinki beno kuwaka ve Énoch? Samu na yinki beno kuwaka ve baprofete yango yankaka yina longaka?” Ba vwandaka ya kufundisa. “Mu kele Mwana ya Nzambi yina vwandaka moyo mbala mosi. Mu...Menga ya Munu kutangaka. Mu me kwiza na kutuba na beno, Mu me lungisa, yina baprofete tubaka ti Mu zolaka sala.” Yandi me kwenda na yisi me luta bampeve ya yimbi, mbala mosi na difelo, me botula bafungula ya lufwa mpe ya difelo na dyabulu, me kanga yawu na lweka ya Yandi, me banda na kuvutuka na zulu. Alleluia!

²⁰³ Suka ke na kubanda. Alleluia! Beto fikula mwa kifikulu awa. Na suka-suka, ya kele na nkonga yankaka yina kele awa na Paladiso. Ba kele kuna ntangu yayi ve.

²⁰⁴ Ntangu yayi, beno bankundi ya nene ya Katolika yina ke kwikilaka na kusambila ya basantu. Kana beno ke na kuzonza na santu na kati ya dibuundu ya beno, ti muntu yina kele musumuki, yandi kele na difelo, to—to ke na kuingilaka kuna lusambusu ya yandi. Mpe kana yandi vwandaka santu, yandi kele na nkembo ya Nzambi mpe lenda vutuka ve. Ya kele kieleka. Mu lenda lakisa yawu. Menga ya bangombe ya babakala zolaka katula ve disumu, kasi Menga ya Yesu me katula masumu.

²⁰⁵ Mu lenda mona Yesu kumata kuna kisika, na Paladiso, kuna kele na mbuta Abraham, Isaac mpe Jacob, mpe bayankaka na kati kuna, Samuel mpe bawu nyonso yankaka na kati kuna. Mu lenda kuwa Yandi kukonkota na mwelo. [Mpangi Branham me kokota na chaire bambala sambanu—Mu.] Amen! Oh, mu zola yawu. Mu ke na kukuma kaka... kumitala mutindu musambidi ntangu yayi. Mu lenda mona Yandi kutala kuna. Mu lenda kuwa yandi kutuba, “Nani kele na ngaada kuna? Nani Ya kele kuna?” Yandi me tuba, “Mu, yayi kele Abraham ke na kuzonzaka. Nani Ya kele?”

²⁰⁶ “Mu kele Nkuna ya Abraham.” Amen. Mu lenda mona Abraham kukwiza na mwelo, kufungula kielo. Yandi me tuba, “Mu kele Nkuna ya Abraham.”

Daniel me tuba, “Beni tala kuna! Ya kele Ditadi yina mu monaka kukatuka na mongo.”

²⁰⁷ Mu lenda kuwa Ézéchiél kutuba, “Yandi yayi! Mu me mona Yandi, mutindu fundu-fundu na yisi ya makulu ya Yandi, matuti

ke na kuluta, ntangu bankombo ya babakala . . . kubula maboko ya bawu, matiti, mpe bawu nyonso kubokaka.” Oh, mu lenda mona bayankaka kuna na Paladiso, kuvingila Yandi.

²⁰⁸ Mu lenda kuwa Yandi kutuba, “Beno kwiza! Kilumbu ke na kubanda kuna na Jérusalem. Beto fwana kubasika awa. Beto ke mata, samu ti beno salaka kivuvu na menga ya bangombe ya babakala mpe ya bankombo ya babakala, na kuvingilaka ntangu ya Menga ya Munu. Kasi Menga ya Munu kutangaka kuna na Calvaire. Mu kele Mwana ya Nzambi yina me kituka muntu. Bamfuka nyonso ya disumu me futama. Beto ke basika awa!” Alleluia! Nkembo na Nzambi!

²⁰⁹ Mu lenda mona Abraham kubaka Sarah na diboko, mpe awa bawu me kwenda, mbala mosi na ngaanda! Na Matthieu 27, ntangu yandi basikaka, mu lenda kuwa bawu kutelama kuna fyoti pene-pene na Jérusalem. Mpe kima ya ntete beno zaba, Mu lenda mona Caïphe na bayankaka kutelama na bala-bala, kutuba, “Ba me tuba na munu ti muntu yina me vumbuka na lufwa. Ba me tuba, nani kele muntu yina ke na kukwenda kuna; ntwenya ya bakala yina, ntwenya ya kento yina?”

²¹⁰ Kele dyaka ve biboba; ya vwandaka Abraham na Sarah. Mpe bawu me zimbana. Ba me tala, “Muntu ke na kutalaka beto.” Ba zolaka zimbana kaka mutindu Yandi lutaka na kibaka, mutindu mosi ya nzutu. Alleluia! Kieleka. Awa kele baprofete nyonso mpe bayankaka, ke na kutambula, ke na kutala mbanza.

²¹¹ Mpe Yesu me fungula nzila samu na kukota, to na ntwala ya bambwetete, ngonda, matuti, mpe me nata ya kukanga bankole, me pesa makabu na bantu. Yesu kele ya vuvwanda bubu yayi na diboko ya bakala ya Tata, me mata kuna, me vwanda, tii ntangu bambeni ya Yandi nyonso ke kuma kinyatila ya Yandi.

²¹² Mpe bubu yayi, nkundi ya munu ya Muklisto ya luzolo, bampeve ya yimbi ke na kusalaka bisika nyonso. Mpe Mpeve ya Nzambi ke kwenda na ntwala, na lweka yankaka, samu na kukanga yandi nzila konso ntangu. Alleluia! Beno bawu yayi. Bazulunale mpe ba-digest mpe nyonso yankaka yina ke na kuzonzila yawu. Ba ke na kutalaka yawu. Ba lenda ve kumona yinki ya kele. Yinki ya kele? Ya kele kifwani ya kuteza ya nene yina ke na kwiza ntama mingi ve, na kati ya Nzambi na dyabulu. Beno kwiza na lweka ya Nzambi mpe beno vwanda ya kusungama na kati ya ntima ya beno. Amen.

²¹³ Awa ntama mingi ve mu vwandaka na Toledo, na Ohio, mu vwanda sala lukutakanu. Mu ke sukisa.

²¹⁴ Beno me mona yinki mu zola tuba samu na bampeve ya yimpi? Ba ke na kusalaka. Ba kele misambidi ya kieleka, kaka mutindu misambidi! Oh, ba ke kwendaka na dibuundu konso Lumingu, ke vutukilaka Ba credo ya Bantumwa, mpe ke yimbaka Kisambu ya kukembila bunene ya Nzambi. Oh, la la, misambidi mutindu kaka ba lendaka vwanda!

“Mpangi Branham, ke zola tuba ti ya kele Kieleka?”

²¹⁵ Ya kele mutindu ya mpeve yina lelikaka Yesu Klisto na kulunsi. Mpe Yesu tubaka, “Beno kele ya tata, dyabulu.”

²¹⁶ Ntangu yayi bayankaka ya bawu ke tubaka, “Oh, Russie kele mbeni ya Klisto.” Ata mbala mosi ve! Russie kele ve mbeni ya Klisto. Mbeni ya Klisto ke vwanda mingi musambidi ti yandi ke vuna yina Soolamaka ya kieleka kana ya lendaka salama.

Beno bambuka moyo, Nzambi ke bakaka muntu ya Yandi, kasi ata mbala mosi ve Mpeve ya Yandi. Dyabulu ke bakaka muntu ya yandi, kasi ata mbala mosi ve mpeve ya yandi. Ntangu yayi, beno tala bawu. Beno sala mutindu beno zola. Mu kele na kizitu samu na Kieleka.

²¹⁷ Bampeve ya yimbi, na kati ya kisalu! Mazono, mu zonzilaka na yawu na kati ya nzutu. Bubuyi, mu ke na kulakisaka beno yawu na kati ya kimpeve, kisika bawu kele na kati ya nsambulu. Kisika bawu kele kuna, yina ba ke bokilaka cancer, mpe yina ba ke bokilaka *yayi, yina*, mpe *yankaka*, kasi mu me lakisa beno, na nzila ya Biblia, ti ba kele bampeve ya yimbi. Ntangu yayi, awa, bubuyi, bawu yayi mbala mosi dyaka na kati ya nsambulu, misambidi ya kieleka, kieleka ya bantu ya kukwikama na Nzambi.

²¹⁸ Kana beno banda, mpangi, na kubanza. Cain, na mbandukulu ya kieleka ya yawu, vwandaka musambidi ya kieleka. Esau vwandaka musambidi ya kieleka. Judas vwandaka musambidi ya kieleka. Ya kele nsambulu. Ya kele ngaanda ya yinza ve. Ya kele kaka na kati-kati. Beno tala yawu mbote, bampeve ya yimbi! Mu banza na mwa bilumbu ke kwiza, kilumbu mosi, mu lendaka kota mwa fyoti dyaka na yawu. Ntangu me banda kukuma ntama.

²¹⁹ Beno fundisa muntu ve. Beno zola muntu nyonso. Kana beno lenda ve kuzola na ntima ya beno, kuna Klisto kele ve na beno.

²²⁰ Na Toledo, na Ohio, mu kotaka na mwa yinzo mosi ya kudya. Mu kudya na kisika mosi, na mwa kisika mosi Dunkard, mwa kisika mosi ya luzolo. Ba vwandaka kieleka bantu ya mbote. Na manima ya midi yina ba kangaka, samu na kukwenda na lukolo ya Lumingu. Mpe na yawu, mu zolaka kwenda na lweka ya bala-bala, na mwa kisika mosi ya mutindu ya yinza, mpe mu kotaka kuna. Mpe mu zaba ti kubula bansaka ya mbongo kele kuzitisa ve musiku na Ohio. Mpe awa vwandaka ya kutelama Pulusu ya Yinsi na diboko ya yandi na zulu ya mwana mosi ya kento, diboko ya yandi yina vwandaka ya kubwa na zulu ya ntulu ya mwana ya kento, vwanda bula na masini ya nsaka ya mbongo. Musiku ya bayinsi ya beto mpe ya yinsi ya beto, nyonso me suka. Kyadi!

²²¹ Mu kele na kivuvu na Klisto Ditadi ya ngolo, mu ke telama, bantoto nyonso yankaka kele zyelo ke dyamaka. Kima dyaka ve me bikana. Ya kele kieleka.

222 Mu talaka na manima kuna, mpe ya vwandaka na mama mosi ya ntwenya ya kitoko, na kutala na kati ya buntwenya ya yandi, ya bamvula kumi na yivwa, kumi na nana, kumi na yivwa. Mpe yina ba vwandaka sala, bana ya babakala yina na manima kuna na mesa, ya vwanda pesa boma. Mu me vwanda kuna. Mpe awa na kuyituka ya munu, vwandaka ya kuvwanda awa kisika mama mosi kwizaka, tubaka, “Beno zola kuzwa kiti?”

Mu tubaka, “Matondo na nge. Mu zola kudya.”

223 Mpe na kuvwandaka na kiti, awa vwandaka ya kuvwanda mama mosi ya kukula, ya kukula mutindu mama ya munu, ya bamvula makumi tanu na tanu, makumi tanu na nana. Yandi vwandaka ya kulwata mwa nyonso zole ya mwa bilele yango ya busantu ve yina ba ke lwataka.

224 Ba ke tubaka ti ya ke pesaka mupepe. Science ke tuba, “Beno kele ya kulawuka.” Kieleka, ya kele ve. Beno zola kaka kulakisa kinkonga ya beno. Ya kele nsoni, nsoni. Mama lendaka lwata yawu ve. Kento lenda, kasi mama lenda ve.

225 Mpe kuna, na yawu kuna bawu . . . kuna yandi vwandaka, ya kuvwanda kuna. Nzutu ya yandi ya mawa vwandaka ya kulemba. Yandi vwandaka na bima yango ya kubongisa misapi ya mutindu orchidée, mutindu nyonso yina beno ke bokilaka yawu, na bikoba ya yandi. Mpe bansuki ya kuzenga mingi mutindu bakala, nyonso ya kuyoka; yina Biblia ke tuba, ti vwandaka nsoni. Mpe kento yina, ti bakala . . .

226 Biblia ke tuba, kana kento zenga nsuki ya yandi, bakala kele na muswa ya kukabuka na yandi na kufwa-makwela, samu ti yandi kele ve ya kusungama na yandi. Beto fwana kwiza mpe kulonga Biblia awa mwa bilumbu yayi. Ya ke tuba, “Kana yandi zenga nsuki ya yandi, yandi me kondwa buzitu na bakala ya yandi.” Kana yandi me kondwa buzitu, ba fwana tula yandi na ngaanda. Beno lenda ve kukwela muntu yankaka, kasi beno lenda tula yandi na ngaanda. Fiou! Bakala, yina, yina na kukota kele mpasi, mu lenda kuwa yawu. Kasi ya kele Kieleka.

227 Oh, ntangu ya ntama, beto vwanda kuzwa yawu na bitezo ya Mpeve-Santu, kasi beto me bwisa bibaka. Mpangi mosi ya bakala ya kiboba vwandaka tuba, “Beto me bwisa bibaka, beto me bwisa bibaka, beto me sala kiwisa na disumu. Beto me bwisa bibaka, mameme me basika, kasi wapi mutindu bankombo ya babakala me kota?” Beno me bwisa bibaka. Ya kele yina vwandaka dyambu. Beno me bwisa bibaka, yinza na dibuundu me vukana kintwadi. Kaka mutindu bantu ya Moab mpe nyonso, mpe Balaam, mpe mutindu yandi kwelanaka na kati-kati ya bawu, ya kele kaka kieleka kima mutindu mosi bubu yayi. Mpe dibuundu kele yawu nyonso ya kupola, mpe nsungi ya Pentecote kele nsungi ya Laodicée, yina ke na kukuma ndambu tiya, mpe ke lukama na yinwa ya Nzambi. Mpe na kati ya nkonga ya muvimba, Nzambi ke na kubokila ndambu ya Yandi, ke nata

Yandi na Yinzo, ya kele kieleka ya kulunga, kieleka, na nzila ya mvumbukulu ya mafwa.

228 Mpe kuna yandi vwandaka, ya kuvwanda kuna, kima ya kubongisa ya bikoba bisika nyonso na kizizi ya yandi, mpe ya vwandaka bisika nyonso mutindu yayi. Mpe yandi vwandaka na kima ya ndombi yayi awa na zulu ya meso ya yandi, mpe yandi vwanda toka, ya vwanda tanga. Mpe kiboba ya mawa yayi zolaka vwanda na batekolo na manima ya batekolo. Mpe yandi vwandaka ya kuvwanda kuna na babakala zole ya kukula, mpe mosi ya bawu vwandaka na lele ya laka ya nene na laka ya yandi, mpe ya vwandaka na Ngonda ya sambanu, ya kuvwanda kuna. Mpe yandi telamaka, mpe ya vwandaka mutindu ti yandi vwanda kunwa, mpe kiboba ya kento vwandaka kunwa, mpe. Mpe yandi vwanda tala bisika nyonso.

229 Mu banzaka, “O Nzambi! Nzambi, samu na yinki Nge lenda kaka ve kukatula kima yayi na kalati ya bayinsi muvimba? Samu na yinki Nge lenda ve? Mwa Sharon ya munu ke. . . Mwa bébé ya munu, mwa Sarah ya munu mpe mwa Rébecca ya munu fwana kula na kati ya nsungi yayi, kukutana mutindu ya bima yayi?” Mu banzaka, “Tala awa na ba-parc mpe bima yayi, mpe yina ke na kusalama.” Mu banzaka, “O Nzambi! Oh, mu kele na kyese ti Nge bakaka Sharon kana ya vwandaka luzolo ya Nge. Mwa Rébecca ya munu mpe mwa—mwa Sara fwana kula na mutindu ya bima yayi?” Yina, mpe bantu yayi ke bokila bawu. . . ke yimba na kimvuka ya banzumbu mpe nyonso. Mpe mu banzaka, “Ya ke sala nsoni ve?” Mu banzaka, “Nzambi, wapi mutindu kudedama ya Nge ya Santu lenda bika yawu? Ya ke talana mutindu ti makasi ya Nge ya kusungama ke telama kuna mpe—mpe ke pasula kisika yayi.”

230 Mpe mu kuwaka Wanzio ya Mfumu, kutuba, “Kwiza lweka yayi.” Mu me kwenda kuna. Mpe ntangu Yandi me manisa na munu, mu tala mutindu muntu ya mutindu yankaka. “Samu na yinki nge ke na kufundisa yandi?”

Mu tubaka, “Tala yawu, mutindu yandi kele.” Mpe beno tala yina Yandi. . .

231 Mu me mona vision. Mu monaka yinza mutindu yayi, ya ronde, yinza yankaka. Kasi yinza yayi awa, ya vwandaka na mukyama na ziunga ya yawu, mpe ya vwandaka Menga ya Klisto yina ke kengilaka na ntwala ya nkele ya Nzambi. Yandi zolaka tala na yawu ve, Yandi—Yandi ke tsyamuna kima kaka na ntangu yina, samu ti Yandi tubaka, “Kilumbu beno ke kudya yawu, kilumbu yango beno ke kufwa.” Na yawu Yandi ke sala yawu.

232 Kuna mu banzaka mutindu yayi. Mu monaka munu mosi. Ata ti mu salaka yawu ve, kasi mu vwandaka nsumuki, na mutindu nyonso. Mpe na yina Menga ya Yesu Klisto ke salaka samu na beto mutindu tala-tala. Beno me mona? Ti, ntangu mu ke sumukaka, masumu ya munu ke bula Yandi mpe ke tuta

yintu ya Yandi ya ntalu, mpe mu lendaka mona masangasa mpe Menga kutanga. “Lemvokila yandi, Tata, yandi zaba ve yinki yandi ke na kusalaka.” Mpe mu vwanda sala kima yankaka mpe vwandaka bula Yawu. “Lemvokila yandi, Tata.”

²³³ Kana ya sikamaka ve na Yandi, mu zolaka kufwa. Mpe kana mu ndimaka ata mbala mosi ve lemvo ya Yandi, mpe kilumbu mwela ya munu ke sabuka tii lweka yina, mu kele yimeni ya kufundisa. Mu mangaka. Ya kele na kima ve yina me bikana kana lusambusu. Ya kufundisa, ba fundisaka munu yimeni. Nzambi tubaka, “Kilumbu beno ke kudya yawu, kilumbu yango beno ke kufwa.” Kuna beno kele ya kufundisa. Na manima ya midi yayi yayi kele kisika ya lusambusu, nkadulu ya beno na ntwala ya Klisto.

²³⁴ Mpe kuna mu banzaka, “Yinga, yina kele kieleka.” Mpe mu me mona kilumbu mosi mu vwanda bendama na Yandi. Mu monaka buku ya munu ya ntama yina vwandaka kuna, nsumuki, kuna nyonso vwandaka ya kusonika. Mu monaka ti masumu ya munu kele yina vwandaka sala yawu, mpe mu tubaka, “Mfumu, Nge zola kulemvokila munu?”

²³⁵ Yandi me tula diboko ya Yandi na lweka ya Yandi, me basisa Menga, me sonika na zulu, mpe tubaka, “Ya kulemvuka.” Me losa yawu na mubu ya kuzimbana, samu na kubambuka dyaka yawu moyo ve. Ya kwendaka ya mbala mosi! Yandi tubaka, “Mu lemvukilaka nge, kasi nge ke na kufundisa yandi.”

Yina sobisaka dibanza ya munu. Mu tubaka, “Mfumu, tala munu kyadi.”

²³⁶ Na manima mu basikaka na kati ya yawu, mu me kwenda kuna mpe me vwanda. Mu tubaka, “Mbote, mama?”

Yandi me tuba, “Oh, mbote.”

²³⁷ Mpe mu tubaka, “Kana nge lenda lemvokila munu,” Mu tubaka, “Mu kele Révérend Branham, mulongi.”

Yandi me tuba, “Oh, lemvokila munu. Lemvokila munu, Révérend Branham.”

²³⁸ Mu tubaka, “Mama.” Mu tubilaka yandi disolo. Mu tubaka, “Mu vwandaka ya kutelama kuna, mpe mu vwanda fundisa nge, mpe vwanda banza, ‘Mutindu ya kele kima ya boma!’ Ya lendaka vwanda ti beno kele na bana.”

Yandi tubaka, “Mu kele na bana.”

²³⁹ Mu tubaka, “Yinki me sala ti ya kuma yimbi?” Yandi me banda na kufungula munu disolo yina lendaka pasula ntima ya muntu nyonso. Mu tubaka, “Mu—mu vwanda lomba Nzambi na yinki Yandi lendaka kombola kaka ve na zulu ya ntoto kima ya mutindu yayi. Awa, nge awa na binwa-malafu zole ya babakala yayi, mpe nge kele ya kukola, nge mosi.” Mpe mu tubaka, “Kilumbu. . . Menga yango ke na kusimbaka nganzi ya Nzambi na kwiza na beno. Nge ke kufwa mosi ya bilumbu yayi. Mpe,

kuna, nge kele—nge kele na kimpwanza ya kusoola ntangu yayi, nge lenda manga to kundima.” Mu tubaka, “Kasi kilumbu mwela ya nge ke kwenda lweka yankaka, kisika kyadi kele ve. Mpe kana nge kufwa na masumu ya nge, nge kele ya kufundisa yimeni, mpe nge ke kwenda na difelo.”


²⁴⁰ Beno zaba yinki? Kento yina me syelumuka na kiti yina kuna na kati ya yinzo ya kudya yina. Beto kuzwaka lukutakanu ya bisambu mutindu beno me kuwaka yawu ntete ve na luzingu ya beno, mpe yandi kwizaka na Klisto. Yinki ya kele? Beno fundisa bawu ve; beno tuba na bawu Nsangu ya mbote. Ba kele ya kuyala na mpeve ya yimbi; ba kele bantu yina ke kufwa na kitezo yayi. Ba kele na yisi ya lutumu ya lweka yayi awa. Lutumu ya beto ke katukaka na zulu. Beto mona yina beto lenda sala na bintona ya beto, samu na kununga bayankaka samu na Klisto.

²⁴¹ Tata ya beto ya Mazulu, mu ke na kutonda Nge samu na mambote mpe mawa ya Nge. Lemvokila munu, Mfumu; mu ke na kubanza, na bantu, mu me kangaka bawu awa bangunga mingi. Kasi mutindu yayi kele kukanga ya balukutakanu yayi na manima ya midi yayi, nsatu ya munu vwandaka ya kutuba na bawu, “na bampeve ya yimbi,” mpe mu me kota mingi na bufyoti-fyoti ya yawu na kisika mosi, na dilongi mosi, kasi mu banza ti ba ke lenda kubaka yawu, awa mpe kuna, mpe kubakula yina mu zolaka tuba. Nge zaba balukanu ya ntima ya munu, na kulongaka yawu.

²⁴² Ti bantu katuka awa na manima ya midi yayi, mpe ti babakala mpe bakento kutala mbote konso ndyatulu bawu ke sala, kasi bawu zinga na kyese mpe na kimpwanza. Ti ba zaba ti Nzambi me vulusa bawu. Mpe ti ba tala na Yandi, ba zimbana ba-isme mpe bima nyonso yina kele pene-pene ya bawu, mpe ti ba zinga na ngemba mpe na luzitu, mpe na kati ya kubanga ya Nzambi. Mpe na yina, Nzambi, ti ntangu Nge zola kusadila bawu samu na kima nyonso, Nge lendaka zonza mbala mosi na bawu mpe kufidisa bawu kisika nyonso Nge zola bawu kukwenda to nyonso yina Nge zola bawu kusala. Ti bantu vwnda ya kulemvuka mpe tala Klisto na kati ya ntima ya bawu. Lemvokila beto, Mfumu, banzimbani ya beto, mosi na mosi ya beto.

²⁴³ Mpe beto zaba ti—ti Satana kele mutindu nkosi ke na nsatu, bisika nyonso, ke kudya yina yandi zola, na kulwataka bifikulu ya misambidi. O Nzambi, mwa bana ya mawa yayi, tala bawu, bisika nyonso. Ba kele mwasi mpe ya kukondwa nkebolo na ntwala ya bantu. Mpe mu ke sambila Nge, Nzambi, na kuvwanda na kyadi na bawu, mpe vuukisa bawu nyonso yina kele ya kuzimbana, belusa bambevo. Mpe, Nzambi, beto zaba ti bampeve ya kubela ya ntama ya yimbi yayi yina ke kwizaka na zulu ya bana ya Nge, ti Nge kele na mulemvo ya masumu yina kele kuna, samu na kukipe yawu. Mpe bampeve nyonso ya yimbi yina ke sala bawu kusumuka, Nge kele na mulemvo ya masumu

yina kele kuna, ti yawu ke kipe yawu. Mpe mu ke sambila ti Nge kupesa yawu na Nkumbu ya Yesu. Amen.

Mu ke na kumiyufula kana ya . . . 

53-0609A Bampeve Ya Yimbi, Na Kati Ya Nsambulu
Roberts Park Amphitheater
Connersville, Indiana U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org